

MAYENDAMENO



Kana seo ha si ezi fela nto yeñwi ku mina? Sa eza luli. Halu inameñi cwale mwa tapelo.

² Mulena, sina mo ku bulelezwi ku luna mwa pina ye lateha ye, *Mo U Bezi Yomutuna*, mi lwa nahana, kakusasana cwana, ki sikamañi se ne luka eza kambe ne si ka Wena! Mi cwale ha lu nahana kuli Wena u yomutuna hahulu, mi kipeto lilato la Hao la Ku hapeleza kuli u lu tokomele, kona kuli moyo waka haukoni ku li utwisisa. Ki niti. Ni lapela kuli U lu fuyole kacenu, cwale halunze luzwelapili ku kena mwa sebelezo, kuli U lu komaunele Sinkwa sa Bupilo, ili yona sinulo ya Kreste. Kakuli lu kupa ka Libizo la Jesu. Amen.

³ Muzwale Ungren ki mutu ya tahanga kamita kwa tabernakele. Mi upila mwa Memphis, Tennessee, yena ni bo mahe, musala hae. Ni lubasi kaufela ba tahanga kwa tabernakele. Mi ha ki hañata fo Ni mu utwelanga, kakuli hañata ki nto ye patehile maswe, kono kakusasana cwana Ne ni bata ku mu utwa ha opela pina ye. U opezi yeñwi, iliñwi ya ze ni tabela hahulu, *Kuzwa Kwa Kanya Ya Hae*. Mi zeo ki lipina zaka ze ni lata. Mi Ne nina ni lithonolo lelituna la ku kopana ni bo ndatahe, kakusasana cwana, nako yapili ye Ni kile naba ni lithonolo lani, ki muuna yomunde. Mi—mi Muzwale Ungren, bo ndatahe, habana—haluna kuya haibile fela mwana bona wa pila, Morris, kakuli kaufela bona ba bonahala kuswana.

⁴ Mi musala hae, bo mahe Muzwale Morris Ungren, ba pilile fela lilimo ze lishumi ka ze ketalizoho ze fitile ka muhau wa Mulimu. Yena luli ubile susumezo yetuna kuna, ka kubona cwalo; kufita mwa liholo ze nsu za na keni kuzona, kono inza swalezile kwa lizoho la Mulimu le li sa fetuhi. Li bonisa ku luna busepahali bwa Bukreste, ni tumelo ya baba lumela cwalo. Kacwalo, Ni tabile hahulu ka seo kakusasana cwana.

⁵ Ne luna ni fela sinawenga, fa ndu yafafasi. Bana baka bababeli ba nyalana, mi ki bana baka kuzwa mwa tabernakele; yena Billy Simpson yomunyinyani ni musizana wa Myers, neba bile mwa lilato fa nako yetelele nyana; Sharol, eeni. Nebali cwalo. . . Ni bona hape ki bahabo mo, kamba yena Sharol Myers yomunyinyani ucwalo, ku Muzwale Ungren ni bona. Kacwalo, lu tabile ka bona, Ni bona kuli ba ngile sibaka sa bona, kasamulaho wa kunyalana, ba kutela kwa muyaho wa keleke, ni kuina fafasi ku to teezeza kwa sebelezo. Bana bani kamita babile ni sibaka se si tungile mwa pilu yaka, kakuli ba kuteka hahulu Linzwi. Bona—bona ba lata fela Linzwi. Ha ni sepi cwalo, kuli Na kona ku ba biza kuli banake, Ha ni sepi kuli ki babande kufita bana

babañwi. Kono bona ba talimela fela kuna, mi Na—Na—Na ni talima ku Mulimu ka bona.

⁶ Billy yomunyinyani na bata ku nyala, mi na saba kuli na ka ya kwa busole. Mi nekuna ni bababeli kamba babalalu ba bona mwa buino bo buswana bwani. Mi bashimani bani ba taha ku na, mi bali, “Muzwale Branham, luna—luna ha lu lati kuba baba toba fa musebezi, kono lu tabela kuli u kupe Mulimu.” Mi ba ni fa mayemo a kuli ba tabela kuba kwahule ni za busole, haiba ba kona; isiñi kuli ne ba sa lati ku sileleza naha yabona, mwa lika kaufela ze ne bakona. Kono taba neli cwana, kuli hane baka—baka ya, ne ba ka yo kena mwa batu ba ba maswe kwande kwani mwa (Ha ni zibi mo mu li bizeza) ma PX, kamba mu li biza cwani kaufela, mi kipeto bazwela kwani ko ku fumaneha basali ba ba mapunu bani inge ba zamaya ona cwalo. Sani ha ki sibaka sa lukela kuba kusona mushimani wa Mukreste, mi kacwalo Mulimu a alaba kupo ya bona.

⁷ Mi cwale Billy yomunyinyani ataha kakusasana cwana, ku to nyalana ni Sharol yomunyinyani yoo, kacwalo lu tabile ka bona. Mi lu ba lakaleza bunde luli mwa Mubuso wa Mulimu, ka bona.

⁸ Mi cwale ye ibile nako yende ku luna. Lubile ni sitopa sesinde sa sikolo sa Lasunda mo kakusasana cwana, ki keleke yetezi, kacwalo lu tabile hahulu. Mi linako zeñata, bakutazi, sa—sa lu susuezanga ka kubona sicaba ha si taha ku to ku teezeza. Kakuli, mwa bona, hakuna ya lata kubulela kwa lipula za mukungulu, kakuli ki . . . Ne luka bulela fela zeswana ni ha ne ku kaba kuna mutu alimuñwi mo. Kono niteñi ku utwahala hande ha u nahana kuli, “Haiba nji *yo* a si mbwinja, yomuñwi uka si utwa.” Mwa bona. Mi si tisa shutano, si tisa maikuto a kanya.

⁹ Mi cwale, mwa litaba za lipuzo fela cwale, se ki kuli, haiba lu kona ku matela ku zona kapili.

¹⁰ Ne ni katani Muzwale Boutliere hane Ni zwela fande, mi ne Ni si ka mubona kuzwa fo Ni bezi fa. Se nili, “U inezi kai?”

Ki hali, “Ni sweli ku ba tatehela ngangalukunyi ya manzibwana.”

Mi kacwalo Ne ni sweli ku mu bulelela kuli Ni latehezwi ki zeñwi. Ki hali, “Wena?”

Se nili, “Ha u si ka cinca ni hanyinyani.”

Ki hali, “Ni wena ha u si ka cinca.”

¹¹ Se nili, “Boo luli ki butali.” Se nili, “Kono, wa ziba, Ni cincize. Ni zwile fa handeleti ni sebente, kuya fa handeleti ni fote-faifi, kona kuli Ni cincize luli.” Masuti aka kaufela, niona, se li amatuna maswe kuna. Mi yomuñwi na ni lekezi fela yeñwi zazi leliñwi, kacwalo Na kona ku itina mane i fite fafasi cwana; yona ne i sa nyendaeli fa maheta, ni kuli sa mwa teka si kuwela fahalimu.

12 Kono Ni—Ni lika kueza zende katata luli ku Jesu Kreste ha Ni na ni kolo ya kueza cwalo. Mi kutaha kwa mina kwa buñata!

13 Ne ni sweli kubulela mwa muzuzu fela cwale, Ni boni Moya o Kenile o mutuna ha u zwise kansa mwa mubili wa musali, ona mwahali mwani. Ki—ki musali yazwa kwa Texas. Mi kalibe aina fani, ye Ni si ka bona kale fateni mutu ya ikalezwi cwalo, musala mukutazi, fa mizuzu nyana yefitile. Mi Mulena ani bonisa pono ya hae ali kuina fani, mi Na mu bona. Na lizize kwa New York, mi na bata ku picukela kwanu. Nana ni fela mizuzu ye ketalizoho, mi abona muuna hae inza kula bakeñisa litombo za mwa mba, mi se ne si tisize litombo za mwamba neli kulata musala hae. Mulimu Yamata kaufela, kuzisa musali yainzi fani yani. U inzi, usweli ku ni talima cwale. Kacwalo, mi hape Ni bata ku kubulelela, muzwale, litombo za hao za mwamba li felile. Mwabona? Eehe, ukaba hande cwale mi ukutele mwa musebezi wa Mulena.

14 Cwale, ha mubona sika sa eza Mulena, hamu—hamu koni fela kuitoboha ku sona. Mu ka bata fela kuzwelapili kuya, kuzwelapili kuya, kuzwelapili kuya, kuzwelapili kuya.

15 Mi, cwale, maabani busihu ne luna ni sebelezo yetuna ya litapelo, mi zeo ki zende, zeo ki zende. Kubeya mazoho fa bakuli, ki nto yende. Kona fela ze ezahalanga, linako zeñwi. Mi hape kuna ni babañwi babali kuna ni sesiñwi kwa mulaho kwani, kuli ha—ha koni kuswala, mi ulukela kunga mutu yani ni kufumana se sili sona. Mwabona, kuna ni sesiñwi se si ba tibela, kuna ni se si mwa nzila. Mi muluti ulimuñwi fela uka li lyanganiseza kwahule.

16 Cwale, kalibe nyana mwani fa nako yefitile, na li ya ikalezwi maswe, a filikana hahulu. Mutu ya shebile, mane na palelwa nihaiba kubuyela. Na sweli fela, “*kuyetela, kuyetela,*” mi fela—fela kuzwelapili ona cwalo, mwabona.

17 Cwale, nto yo na ni kueza. Yena u mwahali nyana fela, mwabona. Ki kuswala moya wa hae. Mwabona? Mi kipeto u sweli kubonisa ku yena muhupulo wa hao luli. Mwabona? Mu u cinca munahano wa hao. Mwabona? Mi cwale ha si eza cwalo, kipeto wakona ku mutisa mwahali ku Kreste, mi kuzwa fani wakona kuzwela pili. Kono u nani ku cinca mukwa wa kunahana kwa hae, mwabona. Hakoni ku u cinca ili yena. U matezi fela mwa bupulumuki, u lukela ku lemuha taba yecwalo. Cwale kuna ni sesiñwi nyana se si ku fa nto yeñwi. . . Usike wa lika ku libala; usike wa lika cwalo. Lumela fela ni kuzwelapili kuya.

18 Kana mbututu yani na ka kona cwani, inza lobezi mwa mazoho a bomahé, bene ba shwile kuzwa ka naini kiloko kakusasana wani, mi ona cwalo fela mwa busihu busihu bwani, moya nyana wani ukai? U lukela kufumana moya wani ni ku ukutisa. Mi cwale ha u ubona u kuta, kona kuli wakona kuzuha ka Libizo la Mulena ni kubiza kulona. Mwabona, kona kuli li ka

ezahala. Kono kufitela ueza cwalo, usweli fela kusinya bupilo bwa hao, mwabona.

¹⁹ Haki—haki nto yeñwi ya buipiteli. Ki kufumana Mulimu, kuli uzwe mwa nzila ni ku lumeleza Moya o Kenile u itusise wena mwa lika kaufela Za bata kueza. Kona cwalo. Taba ya butokwa, ya mpo ifi kaufela, ki kulibala mihupulo ya hao, ni kulumeleza Kreste. Mi kaufela sene I bulezi, haiba ubata kuziba kuli ki Kreste kamba nee. . . Mi haiba ki maikuto fela, lituhele fela zeo. Kono haiba ki maikuto fela, tuhela fela zeo. Kono haiba li ñozwi mwa Linzwi, kona kuli ki Mulimu. Kamita muatulange lika kaufela, zeo moya u mi bulelela, ka Linzwi. Linzwi, usike wa keluha kwa Linzwi lani; haiba ueza cwalo, u latehile.

²⁰ Cwale, lu si ka ina kale kufitela musihali tuna, kubulela fela ona cwalo, ha lu apuleñi fela mwa Bibeke ni kubala Mañolo amañwi fa. Mi kipeto luka ba ni. . . Na lata Linzwi la Mulimu. Na ziba kaufela lwa ezanga cwalo. Cwale ne lu sina. . .

²¹ Ne ni ka kutaza, kakusasana cwana, kamba kubulela, kuluta mwa sikolo sa Lasunda, ka za likunutu zepatilwe za Mulimu kuzwa kwa mutomo wa lifasi, ka kupatululwa ku Jesu Kreste. Mi ne Ni si ka fumana kolo ya ku kena ku zona. Ni libezi ka za kutaha kwa sinawenga, kacwalo Ni—Ni kona kuba ni zeo mwendi nako yetatama.

²² Cwale Ni ka bala libaka zetalu mwa Bibeke. Sa pili, Ni bata kubala kuzwa mwa Mafilipi 1. Kauhanyo ya 1 ya Mafilipi, kukala ka timana ya 19, ni kubala hape ku ya fa 22.

Kakuli Ni ziba kuli taba yeo i ka fetuha bupilo ku na ka litapelo za mina, ni ka tuso ya Moya wa Jesu Kreste,

Mi ki se ni libelezi hahulu, mi ni na ni sepo ya kuli Ha ni na ku swabiswa ki sesiñwi, kono sina kamita ni ka bulela ni sa sabi, sina kamita, mi ni ka nako ye Kreste u ka lumbwa mwa mubili wa ka, kamba ka kushwa, kwa ka.

Kakuli ku na ku pila ki Kreste, mi kushwa ki bufumu.

Kono haiba Ni pila mwa mubili, ni ka sela muselo wa musebezi waka: hakulicwalo ha Ni. . . zibi se Ni ka keta.

²³ Cwale mwa Buka ya Maroma. Mi lubata ku kalela fa kauhanyo ya 8 ya Maroma, ni timana ya 35, kuli lu yahe ku se Ni bata kunga kuba tuto.

Ki mañi ya ka lu kauhanya kwa lilato la Kreste? ikaba manyando, kamba ñalelwa, . . . maswenyeho, . . . tala, kamba mapunu, . . . manyando, . . . ni lilumo?

Sina mo ku ñolezwi kuli, Ka na lu bulawa lizazi kaufela. . . kabakala hao; lu talimwa inge lu linguze yo tabwa.

Batili, mwa linto zeo kaufela lu tula ni ku fita batuli ka ya lu latile.

Kakuli Ni kozwi kuli, nahaiba lifu, kamba bupilo, kamba lingeloi, nahaiba ze busa, nahaiba nahaiba ze liteni, nahaiba ze sa taha, kamba . . .

kamba bupahamo, . . .butasi, nahaiba nto yeñwi ye bupilwe, se si kona ku lu kauhanya ni lilato la Mulimu, le li li teñi ku Jesu Kreste Mulena luna.

24 Mwa Likezo 2, ni timana ya 30:

Mi kakuli neli mupolofita, mi ka kuziba kuli Mulimu u musepizize ka luci, kuli Kreste ka butu uka zwa mwa lusika lwa hae, kuya ka nama, na ka zusa Kreste kuli mane aine fa lubona lwa hae;

25 Cwale ki sishañata sa Mañolo, ka kushimbuluka ni kupotoloha kuzwa sibaka se kuya ku sesiñwi, mwa Bibe. Kono lwa ziba cwalo, haiba Liñolo lelituna le libalilwe, lu ka fumana nto yeñwi mwahali Mwani ye ka—ye ka lu tusa. Cwale Mulimu alu tuse cwale, sina ha Ni tabela kunga tuto ye, kakusasana cwana, sina linzwi la kuli mayendameno: *Mayendameno*.

26 Cwale luna, hane Ni sweli kubala tuto ye, Na ya mwa buka ya litaluso za manzwi. Na hupula kuli, “Sikamañi? Kuna ni ya zwelapili kubulela kuli, ‘Ani kona mayendameno, ki niti. Mayendameno, se ki sona.’” Na hupula kuli, “Linzwi lani ki nto mañi? Li talusa sikamañi, *mayendameno?*” Mi Na ya mwa buka ya litaluso za manzwi kuli ni fumane sene li talusa.

27 Webster uli, “lipetahalile kulona liñi, halina fo lifelela mata, mane ki ona mafelelezo.” Mwabona, “halina fa felela mata, lipetehile ku lona liñi, mi mane ki maungulo luli,” linzwi leo la *mayendameno*.

28 Mi Ni tabela kubulela cwana, ni kusepa kuli mu ka swala manzwi aa, kakuli ha Ni muituti wa za bulapeli mwa ku li ezeza, ka mukwa wa kutisa taba ye tabisa ka mukwa wa ngana yeitutile litaba ze kona kuswala sicaba. Taba fela ye Ni eza, ki kulika kueza zende ze Ni kona, bakeñisa balikani ba ni file Kreste, mi Ni—Ni—Ni bata kuli ba bone mulelo waka ka za Kreste.

29 Cwale, sika kaufela se si fumaneha mwa bupilo si tamilwe kwa mayendameno. Haukoni ku pila mwa bupilo kusina kuba ni mayendameno. Ha ukoni kuba ni sika kusina kuba ni fo yendamezi, kakuli kona sitoli sa mafelelezo. Ki—ki sona sitoli sa mafelelezo mwa musipili. Ki sibaka fo u tamehile fa sika.

30 Mwa lizazi le lupila kulona cwale, mi lika kaufela lisweli kuikaba, ki ze bunolo mi li fefulwa kapili, Ni sepa kuli Liñusa le likaba nto ye swanela hande, sihulu kwa Bakreste ha ba fita mwa mezi a buliba bwa bona cwale. Keleke ya Bukreste isweli kufita mwa mezi a buliba bobutungile o ibile ni ona mwa lilimo ze likiti zepeli. Kakuli, lutaha fa sibaka fo kuna ni sesiñwi se

si tahiswa kwa Bukreste, sika se bana ni kuba ni buiketelo ka sona, mi Ni sepa kuli keleke ya Bakreste ilukela kuba ni sesiñwi se ba ziba kuli kona fo ba tamilwe, kufita ku kukaana fela inge litali fa mezi, ni moya. Sina Bibehe ha i bulezi kuli, “Ku zukuzeha kuisiwa kai ni kai ki moya omuñwi wa tuto yenca.” Moya ha u taha ku to fukisa litali nyana ka nzila *ye*, mi kipeto moya omuñwi wa taha, moya wa kwa mutulo, moya wa kwa mboela, moya wa upa, moya wa wiko. Ha una kufita fa hule, hauna mayemo. Bupilo bwa Sikreste bu lukela kuba bupilo bo bu na ni mayemo. I lukela kuba sika se si—se si li mulao wakuli—wakuli kona fo tamehile, o fita bupilo mane.

³¹ Mi ulukela kuba ni sesiñwi so tamilwe ku sona. Batu babañwi ba tamilwe kwa pisinisi ya bona. Babañwi ba tamilwe kwa mabasi a bona. Babañwi ba tamilwe kwa lituto za litumelo. Babañwi ba tamilwe kwa busole. Luna ni lika ze shutana ze lu tamilwe ku zona. Kono Ni nahana kuli, kakuba Mukreste, lu lukela kutamiwa fo lu ziba kuli ku lukile, mwabona. Kakuli, wakona kutameha kwa lubasi lwa hao, mi—mi musala hao wakona ku kusiya. Wakona kutameha kwa busole, mi wakona ku bulaiwa. Mi wakona kutameha kwa lika ze shutana, mi lina ni mafelelezo. Kono ku lukela kuba ni kalulo ya mafelelezo. Ku lukela kuba fokuñwi fo—fo mutu una ni ku tama bukamusu bwa hae bwa Kuyakuile. Kakuli, haiba u ka sepa mwa musebezi wa hao, musebezi wa hao ha u so felile, ku felile. Lubasi lwa hao ha lu ngilwe, ku felile.

³² Kono kuna ni fela nto iliñwi ye Ni nahana kuli kona kalulo ya mafelelezo. Mi Ni lumela kuli Paulusi nana ni mayendameno mwa bupilo bwa hae. Mi Ni tabela kuli—kuli ni be kwa neku leliñwi, hane lu ka li biza cwalo, ni kubulela fa sitoli seo. Ki hali, “Kakuli kuna kupila ki Kreste, mi kushwa ki bufumu.” Cwale, Kreste nali Mayendameno a Paulusi. Neli ona mayendameno a hae. Neli ya hae . . . Neli mafelelezo a likañi kaufela. Neli Kreste, neli yena mayendameno a hae.

³³ Paulusi na sina ona mayendameo ani. Na tamehanga kwa sikwata sa Bafarisi. Mi nana ni ku elezwa ni kulutwa, kuli ba mu amuhele ni kuli akone kuba mayendameno ili yena. Kozo zazi leliñwi fa musipili oliba kwa Damaseka, mi akatana Jesu, pata ni pata. Mi kuzwa fani a pumeha kwa sitoli sa Bufarisi bwa hae; ni kuitamelela sinca ili yena hape, kuli Jesu Yana ziba kuli na kokotezwi, kushwa, ni kuzuha hape. Paulusi na ziba cwalo kakuli na kopani ni Mutu sakata. Sani ne si mu cincize ona fani. Na si ka ba yaswana kuzwa fani kuya kwapili. Na si ka katana fela buka. Na si ka katana fela—fela tuto ya litumelo. Na kopani ni Mutu, Jesu Kreste. “Ki Wena mañi, Mulena?”

 Mi ali, “Ki na Jesu.”

³⁴ Ha lu nahaneñi ka za cincheho yani, fa nako nyana. Ni lumela kuli Paulusi nali muuna ya sepahala. Bakeñisa kuli se

ki sikolo sa la Sunda, lu bata ku luta sina sikolo sa la Sunda. Paulusi, Ni lumela kuli, nali muuna, ya sepahala mwa butungi, mi nekusina—nekusina sika ka yena sene si shutana ku mutu ufi kaufela.

³⁵ Bapolofita bani kaufela neli batu sina luna. Bibeles ibulezi ona cwalo. Muñoli Jakobo 5, “Elia nali mutu ya swana sina luna mo luinezi,” nana ni matata a hae, ni ze kola ni zeñwi kaufela, “mi a lapela katata kuli isike ya nela.”

³⁶ Mi Paulusi neli muuna ya swana sina luna. Nana ni ze filikanya, ku kakanya kwa hae. Mi nali muuna ya sepahala. Na putehelanga ku yeñwi ya bulapeli ye ne buli mwa lifasi. Mi a ba muluti wa sikwata sani; alutiwa mwatasa muluti yomutuna, Gamaliele, yanali alimuñwi wa baluti babatuna hahulu ku be ne banani mwa lizazi lani. Bashemi ba hae ne ba tokomezi hande, kuli ne ku na ni sesiñwi mwa bupilo bwa Paulusi, mi ba eza katata kuli aye kwa sikolo, kuli akone ku lutiwa mwa milao kaufela ya Mulimu. Mi, ka busepahali bo butuna, a lumela linzwi kaufela la ona.

³⁷ Mi na utwile mufuta wa sicaba se sinyinyani se, ni mo ne ku bezi mupolofita, mwa na bizezwa, ki sikwata sa Hae, sene si hulizizwe ki Gamaliele, sene si lukela kueza limakazo ni kufolisa bakuli. Kono haili—haili sikwata sa hae ne si fumanaha ku bene ba si ke kuamuhela Muuna yo kuba mupolofita, yena Jesu wa Nazareta yoo, kakuli Na si ka itibahaza Iliyena ni bona. Kacwalo Paulusi na si ka ya, kakuli sikwata sa—sa sicaba sa habo luli ne si sa lumeli ku Zona. Mi ne ba mu lemusize ka zona.

³⁸ Mi Paulusi, ka kusepahala, a hupula kuli, “Haiba taba ye ha ki ya Mulimu, mi keleke yaka ibulela kuli ha ki ya Mulimu, konakuli kuna ni fela nto ilinwi ya kueza, ki ku i bulaya.” Ali, “Ku i zwisa mwa nzila, kakuli ki . . . ikaba sitataliso, ikaba sitibiso, ki simbongola,” ka kulwanisa sikwata sa kulumela kwa hae. Kacwalo a lela mwa pilu kuli azwele kwande a yo sebulula “simbongola,” se ka mwa na si bizeza yena, kamba keleke ya habo mo ne i libizeza, kuli izwe mwa sikwata sa Bafarisi.

³⁹ Zazi lelinwi, ni mañolo mwa pokoto ya hae, kuzwa ku muprisita yomutuna, ku yo tama sicaba kaufela sene sili mwa buino bwani, kakuli wani ne i kaba mupuzo wa na tomezwi Paulusi. Nali mwa musipili wa hae kuya kwa munzi o bizwa Damaseka. Neba ba kukuzisize, kwani mwa Jerusalema. Kacwalo na sweli—na pwacauzi Setefani ka macwe, mi Paulusi na laezi kuli apobaulwe ka macwe, aiponela ka bupaki inza sweli liapalo za hae. Cwale na shetumuka kwani ku yo eza taba yeswana, ni ku zwisa sitibiso tuna se.

⁴⁰ Kono mwendi, ne i lukela kuba ka nako ya musihali, ka ilebene cwalo, twelufu kiloko, a natiwa kuwela fafasi. Mi a si no ba cwalo, a talima mwahalimu mi nekuna ni Liseli liyemi fapila hae. Mi Linzwi la zwa mwa Liseli le, lali, “Saule, Saule,”

ki puzo, “kiñi so Ni nyandiseza?” Cwale Paulusi na zibile, kamba Saule, nitaluse, na zibile kuli sicaba sa hae ne si latelela ona Liseli le liswana lani kuzwa ka nako ye ba zwa mwa Egepita. Mi haiba . . .

⁴¹ Kana mukile mwabona toloko ya Bibeke ya Lamsa, ya kale . . . Si—si sisupo sa kale sa Siheberu sa—sa Mulimu kuli ki Liseli la maneku amalalu; kuli mane mwendi, kinto ye *cwalo*, kuli ki likalulo zetalu za Mulimu, mwa toho iliñwi ya Bumulimu. Mi Liseli la maneku amalalu le, zetalu ku Iliñwi, kakuba Mulimu alimuñwi, neli si—si sisupo sa Siheberu, sa Mulimu, Liseli.

⁴² Mi cwale Mushe ha Mu katana mwa sicacani, mi ki Hali, “KI NA,” ya siyala ali ya swana, zetalu; maabani, kacenu, ni kuyakuile, isali Mulimu ya swana. Mi Mushe a Mu katana mwa sicacani se si tuka. Nali yena Liseli. Mi ha Na zamaisize bana ba Isilaele kuzwa mwa lihalaupa, Nali yena Lingeloi la bulikani, zeo Mushe ka tumelo na boni, mi atoboha Egepita, atalima kuli kushubulwa kwa Krete ki bufumu bobufita maluwo a Egepita. Ka tumelo, Mushe na boni kuli yani neli Krete, yona Tozo. Mi Tozo neisiyo ku mutu usili, kono Ne i li mwa mufuta wa Siita sa Mulilo. Mwabona?

⁴³ Mi cwale ona Tozo yeswana yani ya taha fa kolobezo ya Hae, mi ya kena ku Krete ni ku to pila ku Yena. Joani na zibile kuli neli Yena. Mi ali, “Fahalimwa Yo u ka bona Moya o no ba zwisize mwa Egepita kukena mwa lihalaupa, mi kuzwa mwa lihalaupa kukena mwa naha ya sepišo, ku Yo uka bona siswaniso sa maneku amalalu a Mulimu ha u tuluka ni kulula ku yena, Yena yo ki Yena yaka kolobezwa ka Moya o Kenile ni ka Mulilo.”

⁴⁴ Cwale Paulusi nasina lithonolo la kubona taba ye pili. Kono kuli ibe fela niti, ku mina, Majuda ne ba hanisizwe hahulu ku kubamela siswaniso, kamba kaufela se si cwalo! Cwale ha na boni Liseli lelituna le, a ziba kuli yani neli Mulena. *Mulena* i talusa “buñi, kuzamaisa.” Na—na si ke kubiza sika kaufela kuli “Mulena,” yena Muheberu ya tiile yani, ha na zibile kuli Wani neli Moya. Kono mulemuhe, na ziba kuli ona Siita sa Mulilo se si swana sani neli Sona sene si etelezi sicaba sa habo. Mi kipeto a kuta ni kubulela kuli, “Mulena, Ki Wena mañi? Ki Wena mañi? Ni bata kuziba Yo uli Yena. No katani Mushe ka libizo la ‘YALITENI.’” Kono Ni ka yema fo ni muhupulo wa bona, fa muzuzu fela.

⁴⁵ Jesu, ha Nali mwa lifasi, ali ya tozizwe ka Sani sene ba boni, mulemuhe, Na ize, “Ni zwile ku Mulimu,” ona Moya, ili Liseli, ona Siita sa Mulilo, “mi Ni kutela ku Mulimu.” Mi Na ezizwe nama kuli ashwele libi za luna. Mi kasamulaho wa lifu la Hae, kupumbekwa, zuho, ni kukambama, kasamulaho Amano kambamela kwa lihalimu; mwa mazazi a mashumi amane, A kambamela kwa lihalimu; mi ka lizazi la bu fifite, Na kutile mwa mufuta wa Siita sa Mulilo, mwa sicaba, ni ku ikaba Iliyena, sina

malimi a mulilo, ni kuina fahalimwa yomuñwi ni yomuñwi wa bona. Mi cwale ba tazwa ka Moya o Kenile, ni kukala kubulela ka malimi asili, sina Moya mo no ba buleliseza.

⁴⁶ Mwabona, Mulimu inza ikaba Iliyena; Mulimu pili mwa Siita sesituna sa Mulilo; Mulimu na bonahalile mwa mubili wa butu; cwale Mulimu inza ikaba Iliyena mwahala sicaba sa Hae. Siita sa Mulilo sa ikaba, ni kulula fahalimwa mañi ni mañi wabona, inge malimi a yekauka a mulilo, malimi a kauhani aina fahalimwa bona, ka malimi a mulilo, malimi a kauhani sina mulilo o tomilwe fahalimwa yomuñwi ni yomuñwi wa bona. Mi kamukana bona ba tala Sani, mi ba kala kubulela ka malimi, mo Moya no ba buleliseza.

⁴⁷ Cwale, mwa bona, ha lu sicaba se si kauhani, lu lukela kuba mwa swalisano, kakuli mañi ni mañi wa luna usweli siemba sa Mulimu. Mi luna ni kutaha hamoho, mi kipeto Siita sa Mulilo si bonahala ka kutala, mwa mutalelela wa Sona; fani Keleke ya Hae ha i ina hamoho mwa libaka za Mahalimu, konakuli mutalelela wa mata a Mulimu u ba mwa Keleke ya Hae. Mañi ni mañi wa luna inza sweli limpo za moya ni liofisi za moya, lutaha hamoho, utisa Siita sa Mulilo sani hape.

⁴⁸ Mi Paulusi na zibile kuli yani ki yena Mulena, mi ki hali, “Mulena, Ki Wena mañi, haiba Ni sweli ku Ku nyandisa?”

⁴⁹ Ki hali, “Kina Jesu, mi kutata kuli u lahake kwa miwayo.”

⁵⁰ Mi Paulusi a laelwa kuli a nanuhe ni kuliba mwa mukwakwa o biza, “Onamile.” Mi nekuna ni mupolofita kwani yana tile, wa libizo la Ananiasi, mi a bona pono, mi a mu kolobeza. Mi a ya kwa Arabia, ka lilimo zetalu, ku yo bala Mañolo, kubona ka za Siita sa Mulilo se ne si bonahalile ku yena.

⁵¹ Cwale lu fumana kuli Paulusi, bupilo bwa hae kaufela, nana ni sani kuba kota ya sitoli. Na kopani ni Mulimu, pata ni pata, mi na lumilwe ki Mulimu. Ha sitoli ni seo kwa kutameha! Ha ki Mayendameno ni ao! Ani neli mafelelezo a likañi kaufela. Ani neli mafelelezo a lika kaufela ku Paulusi. Likañi kaufela, lika kaufela za iconga. Hanina taba kamba Bafarisi ne ba bulezi sikamañi, Basaduki ze ne ba bulela, kamba mutu ufi kaufela; na kopani ni Mulimu ya pakilwe ka Linzwi, ani neli ona mafelelezo! Bwani neli bupilo bwa hae kaufela. Kakuli na boni Mulimu ha iponahaza, mi na pakilwe ku yena kuli Neli Mulimu, ka Linzwi, mi ka sibupeho ni mufuta wa Na li ku ona, mi ka Linzwi leli utwahala lene li bulela ku yena ka mo ne liinezi. Cwale, yani neli nto yetuna. Kona ha na bulezi, fapila a—a Agripa kuli, “Ne ni si ka sa hana ku utwela pono ya Lihalimu.” Na tamilwe ku yona. Ne kuna ni sika sa niti, sika sa na ziba, sika sa kuli hakuna ya na ka si zwise ku yena.

⁵² Cwale, kacenu, haiba lu sepa fela mwa tuto, kamba ka—ka mukwa wa musebezi wa—wa tuto ya kutatulula Bibebe, konakuli luna ni yona fela ka kuba mufuta wa—wa minahano. Kono

hakuna mutu yana ni tukelo kwa mulaho wa katala ka, ku kutaza Evangelii, konji haiba u tahile pata ni pata ni Yona.

⁵³ Sina Mushe, kwa mulaho wa lihalaupa, hakuna taba kamba nali ya itutile cwani, kaufela ze ne ezahalile; sabo ya hae ni kufilikana za zwa kuyena kakuli na yemi fa mubu o kenile ni Mulimu, zeo hakuna ya na ka lizwisa ku yena.

⁵⁴ Mi muuna kaufela kamba musali yana ni kutwisiso ni Mulimu, u kopani ni Siita sa Mulilo se si swana se fa mayemo a kenile a pilu ya hao. “Hakuna muituti wa za bulapeli, hakuna diabulosi, hakuna sika,” Paulusi naize, “hakuna se si liteni, hakuna ze sa taha, lifu, matuku, maswabi, ze kona ku lu kauhanya ni lilato la Mulimu lani, le lili ku Kreste Jesu.” Ki kota ya sitoli. U ziba kuli sesiñwi si ezahalile. Hakuna taba kamba sayansi ika yema cwani ni kubulela *se, sani*, kamba *sesiñwi*, u tamilwe. Wena ni Mulimu mu ba alimuñwi. U ku mina, mi muinzi ku Yena. “Ka zazi lani mu ka ziba kuli Ni inzi ku Ndate, mi Ndate u ku Na; Na ku mina, ni mina ku Na.” Mu tamilwe ku Yena.

⁵⁵ Mi Paulusi nana ni—ni bupilo bo bu yendamezi ku Kreste. Neli bupilo bo bu shutana ku bwa na banga ni bona sapili. Nako yeñwi nabile ni muhupulo wa tuto; kono cwale una ni bupilo bo bu yendamezi ku Kreste, ili mayendameno. Hakuna taba kamba Agripa na ka bulela cwani kuli, “Wena, u lyangani, Paulusi. U latehezwi ki ngana ya hao. Wena, u balile zeñata ka kuituta.”

Ki hali, “Ha ni si ka pulumuka.”

⁵⁶ Mi cwale kiha ya ku Agripa, kuli mane a bulela kuli, “Wena mane ubata ku ni hapeleza kuba Mukreste.”

⁵⁷ Ki hali, “Ni lakaza kuli kambe u cwalo, fela kwa neku. . . sina mo Ni inezi, kono litamo ze.”

⁵⁸ Si kuezisa lika, ha uba ni bupilo bo bu tamehile ku Kreste sina Paulusi bwa na nani, ka butu fela haukoni kueza cwalo. Cwale mutalime. Ka butu fela, muuna yani na lutilwe ku za—za Mañolo ni lika kaufela, ka butu fela na ka latelela mwa buino bwani moo na lutilwe ku bona. Kono cwale hana tiloba. . .ni kueza Kreste kuba Mayendameno a hae, Mayemo a hae, konakuli se ku ba ni bupilo bo bu shutana. Na ezize ka kushutana. Na ezize lika ka bukuba, ku sa na lutilwe kueza nako yeñwi. Mi si ka eza nto yeswana.

⁵⁹ Haiba keleke ika zwa mwa Katengo ka Likeleke kani, ni kukuta ku to eza Linzwi la Mulimu kuba mayemo a bona, kuli Linzwi la Mulimu litame mayemo a bona, seo si ka kondisa lika. Kono balika kutameha ku za ipumanezi mutu. Mi zeo lina ni kuwa. Kihande, Biblele ibulezi kuli ba ka eza ona cwalo. Kono ku kaba Munyaliwa ya ketilwe kuzwa kwa mutomo wa lifasi, ze ka tamiwa kwa sitoli seo.

⁶⁰ Nabona Kuyakuile ku kwaluha, ku taha mwa nako, kuzwa kwa Eden. Mi, hane I ezize cwalo, kwa taha muhala wa Mali,

musipili kaufela kupunya kwa Kalvari; mi kuzwa kwa Kalvari, kutameha ka muhala wo, ni kuya kwa sitoli, Jesu. Mi zazi leliñwi Ha taha ku to nga beli ba Hae, mutu kaufela ya tamehile kwa mayemo ani uka zuhela kwa Kuyakuile. Kiñi? Yoo ubile mwa Kuyakuile ka nako kaufela. Na lukiselizwe kale kuba mwa Kuyakuile. Ki siemba sa Mulimu. Nebali mwa munahano wa Hae kwa simuluho. Mi cwale muhala tuna wani ha u u hohiwa, ili muhala wa Mali, Zibahazo yani ye Ne ni ambola, ha i nanuha kuzwa mwa lifasi, mutu kaufela yana beilwe mwa Mali ani uka wela mwa Kuyakuile hape. Kono nzila fela inosi mo ikabela, ikaba ka kutamiwa kwa Mayendameno ani, Jesu Kreste. Ki yena mayendameno! Isiñi za ipumanezi mutu; kono Mulimu ya mu zusize kwa bafu, mi ki Yena Mayendameno. Mi lu ziba kuli Wa pila, kakuli fa U inzi ni luna mwa Mata a zuho ya Hae, ueza lika zeswana za Na ezize ha Na li fa lifasi faa.

⁶¹ Ni tamilwe kwa Mayemo ani. Ani kona mafelelezo a likañi kaufela. Ni tamilwe ku ona. Bwani kona bupilo bwaka. Ne nili mueza libi nako ya ni pilisa Kreste. Ne ni katani Sesiñwi. Mi kuzwa fani sani ha Si taha ku na, i bile—i bile taba ye shutana. Mi Ni tamehile ku yona, lika kaufela ze Ni li zona li tamilwe ona mwani. Mi kona kuli Mulimu wa kauhanya kwateni bupilo bwa Hae, ni ku ni lumeleza kupila ku Yena, mi Yena u kuna, kona kuli lu tamilwe. Na . . .

⁶² Ha si pangi shutano ni yekana ku ze ba bata kulumela babañwi. Ku mutu, u tamilwe ku Sani. Ani kona mayemo a hao. Lani kona . . . lani kona linzwi la mafelelezo. Mi cwale haiba ki Yena Linzwi, konakuli *Le* lina ni kuba linzwi la mafelelezo. Se si lukela ku si kondisa. Kaufela se li bulela Se, Sani ki lona lisila le li fubelu lani. Yani ki Kreste. Mi sika kaufela se si shutana ku Sani, Hakuna ze ni ziba ka sona. Seo kona se lu bata kuziba, ki seo Linzwi le li bulela; kakuli Ni tamehile ku Kreste, mi Kreste ki Linzwi. Mwa utwa cwale?

⁶³ Mi siemba sa Linzwi la Hae se si tomezwi lizazi le, Moya o Kenile wa Hae uteni mo ku to bonahalisa siemba sa Linzwi sani.

⁶⁴ Inge fela mo ne kuinezi kwa mulaho kwani fa kupepwa kwa Hae. Isaya 9:6. Kutaha cwalo mwa Mañolo kaufela, lika kaufela ze ne bulezwi ka Yena, li talelelizwe. Mwani mwa Buka ya Luka, lu bulela kuli ki . . . lwa libona. Mi Nali yena mafelelezo, Nali yena—Nali yena mafelelezo a sipolofita, hape, ka Yena. Na talelelize sani, litaba za kale, lipina, lika kaufela mwa Testamente ya Kale, ze ne bulezi ka Yena, ne li talelelizwe ona fani. Ani neli ona mayendameno. Ani neli ona mayendameno a Linzwi la Mulimu kwa lusika lwani.

⁶⁵ Mi batu baba pepilwe sinca luli ba lusika lo, ba ba talizwe ka Moya o Kenile, kona sitoli sa mayemo a Mañolo aa ona alukela kutalelezwa mwa mazazi a maungulo aa. Kona bona mayemo. Ki mayemo a Mulimu, kakuli ki Linzwi la Hae; mi Linzwi ki

Kreste, yena sitoli. Hakuna mukwa wa kuzwa ku sona. Ki sika se si ku swala.

⁶⁶ Sina ha Ni bulezi, si ka ku ezisa lika zo sa koni kueza ka butu ha u iketile. Ne li ezize Paulusi kueza lika za na si ke kueza ka butu fela. Ne li ezize Mushe kueza lika za na sike kueza ka butu hande. Si eza muuna kaufela ni musali kueza lika ze ba sa koni kueza haba iketile hande ka butu fela. Ki sika se mu—se mu itingile ku sona. Ki sika sesiñwi, Ki sika se si timuna buhali. Si swana sina . . .

⁶⁷ Ki ankora kwa sisepe. Sisepe si tamilwe kwa ankora, mwa nako ya liñungwa. Mi haiba Kreste ki yena Mayendameno a hao, u tamilwe ku Yena. Mwa nako ya butata, sisepe, haiba u si lumeleza ku kuka, si ka nata mwa—mwa—mwa—mwa macwe. Kono se ba ezanga, ba wisanga ankora. Ankora i ka hoholola kufitela i nguba ni kukolatela mwa mutomo wa licwe. Mi sisepe si tamilwe kwa ankora. Ona mayendameno a sisepe.

⁶⁸ Mi Mukreste ya pepilwe sinca u tamilwe ku Kreste, mi Bibeke kona ankora. Kona taba ye lu tamilwe ku yona. Mutuhele likopano, mutuhele lika ze shutana, mutuhele kuli sayansi, mutuhele baluti ba bulele kaufela se ba bata. Haibile fela Linzwi lani li bulela ni ku li sepisa, lu tamehile ku Lona. Kuna ni se si ka lu hanisa kuzwa ku lona. Yeo ki niti. Mukreste wa niti ya pepilwe, u ka pila ni Linzwi lani. Haiba Li bulela nto yeñwi ya kuzwa, ni nzila mwa ku ezeza, kona ona cwalo mo li lukela ku ezeza. Hakuna taba kamba mutu ubulela sikamañi, Seo kona sa bulezi Mulimu. Lu tamilwe ku Sona, ki bupilo bo bu tamilwe ku Kreste.

Kreste, hape, kuswana sina Naleli ya kwa Mutulo.

⁶⁹ Mwa ziba, lifasi la pikuluha. Mi linaleli, luli, yona ye mubona kuli ki naleli ya manzibwana, ki yona naleli ya kakusasana. Lifasi li potoloha fela ku yona. Kono li kwahule ni linaleli zani, kaufela zona kwanda naleli ya kwa mutulo. Cwale ha mu koni kutalimisa masupeza nzila a mina kwa naleli ya manzibwana ni kukona kufita ko muya, kakuli habusa, sikamañi? U inzi kwa naleli ya manzibwana kwa wiko, mi kakusasana otatama u inzi kwa upa. Mwabona, ha ukoni kueza cwalo. Kono mwakona ku itoma fa naleli ya kwa mutulo, amen, ni kuswala siemba sa yona se si petehile. Mu ka fumana nzila.

⁷⁰ Mi boo kona bupilo bo bu yendamezi ku Kreste. Ha u latehile, Ki yena Naleli ya hao ya kwa Mutulo. Mi, haiba ki Yena Naleli ya kwa Mutulo, Moya o Kenile kona masupeza nzila a hao, mi masupeza nzila aka supeza fela kwa Naleli ya kwa Mutulo. Haana kusupa kwa tuto ya tumelo kamba kopano. Haana kusupeza kwa maikuto a mubili, kamba seo kaufela sili sona. A ka swalelela hande kwa Naleli ya kwa Mutulo. Ki yena Naleli ya hao ya kwa Mutulo. Ha u latehile, wakona ku sutiswa ki likopano, ni lika ze cwalo. Kono masupeza nzila, Moya o

Kenile, aka ku supeza hande kwa Linzwi, ili yena Kreste, ni ku ku swelelea ka tundamo. Utamehile ku Sani.

⁷¹ Kucwani kambe nekusina naleli ya kwa mutulo, kana mutu na ka fumana cwani nzila fa liwate la mbundu? Kucwani kambe nekusina Moya o Kenile o no ka ku supeza kwa Linzwi la Mulimu, ku Li bonahalisa ni ku Li paka, ki sikamañi se ne luka eza mwa hola ye? Moya o Kenile u supa fela kwa Linzwi. “Mutu hana kupila ka buhobe fela, kono ni ka Linzwi kaufela.” Isiñi siemba sa Linzwi; kono Linzwi kaufela, kaufela Lona. “Linzwi kaufela le li zwelela mwa mulomo wa Mulimu,” sani kona sa pila mutu ka sona. Yena ki yena Mayendameno a mina mwa bupilo bwa mina, Yena hape ki yena Naleli ya kwa Mutulo.

⁷² Mwa ziba, luna ni kuba ni sesiñwi, se si shutana, kuli lu fite fa mafelelezo a likañi.

⁷³ Mwa ziba, nekuna ni nako yeñwi milao ya micelo fa tafule ne i tingile ku sa na bulezi musali yomuñwi. Ni sepa kuli libizo la hae neli Emily Post. Mwendu na fosa libizo la hae. Ni sepa ki lona, Emily Post. Hanina taba kamba Emily Post nabulezi kuli, “Nopa tipa ya hao u cise ma—ma manawa,” wani ne ukaba mulao. Kiñi? Nali yena mayendameno a litaba za mwa mikwa ya micelo fa tafule. Yeo ki niti. Haiba na ka li, “Amuce ka mazoho,” ne muka ca ka mazoho. Kiñi? Naha ye ne imuezezi kuba mayendameno, ku za milao ya litafule. Eeni, sha.

⁷⁴ Nekuna ni nako fani Germany hane—hane ili mayendameno, mi yani neli Hitler. Neli yena mayendameno. Hanina taba ka sa na bulela mutu ufi kaufela, Hitler hana li, “Eza cwana,” mwa eza ona cwalo. Kihande ueze cwalo. Ki yena linzwi la mafelelezo. Hitler nali cwalo.

⁷⁵ Nekuna ni nako foo Rome hana bile ni mayendameno, mi yani neli Mussolini, muhapezezi. Muuna naile ka mota ka kuitahanela muzuzu ulimuñwi, a mu kunupa ali mwa mota ya hae ni ku mu hohela fande, ali, “Ne ni si ka bulela kuli u itahanele ka muzuzu, Ne ni bulezi kuli ube fa nako yateni.” Mayendameno! Kaufela sa na bulezi, nebana ni kueza cwalo. Nelina ni kusikuluha. Na bulezi kuli uka fetula lifasi kaufela ka linzwi la hae. Li fetuha ka Linzwi la Mulimu!

⁷⁶ Nekuna ni nako foo Egepita hana nani mayendameno. Neli Faro. Ne ni ile kwa Egepita nako yeñwi, ku yo bona fela libaka zani. Mi muna ni ku kata mwatasi liñokolwa ze mashumi amabeli kuli mufumane mileneñi yene tomilwe, mubusisi wa Rome; hane Ni li mwa Rome ni kwani kwa Egepita.

⁷⁷ Mwabona, kaufela zona ne li kutezi kwa liluli la litaba za kale, kakuli neli mayendameno a maswe. Yeo ki niti. Ku fosahalile. Ne ku palile. Ne li mayendameno aipangezi mutu. Mi mayendameno kaufela a ipangezi mutu za ipumanezi mutu liswanela kuya kwa liluli. Lina ni kuya kwa liluli. Ki za mufuta o fosahalile, kacwalo za palelwa.

⁷⁸ Munahane fela ka naha yaluna. Ha lu kena mwa butata, haiba mutu ueza sika, mi balika cwalo mo mwendi mwa—mwa kuta zenyinyani ya muleneñi, kuta yeñwi ya mapokola, kipeto ya zwelapili, ni kuzwelapili, mi mafelelezo itaha kwa Kuta Yetuna kufitisisa. Cwale, Kuta Yetuna kufitisisa kona mayendameno a naha. Ao kona mafelelezo. Cwale, mwa Canada, balikani ba luna kuzwa kwa Canada bakona kuya, kuzwa kwa Canada, kuya ku Mulena wa musali. Kono mwa United States, ki kuya kwa Kuta Yetuna. Ani kona mayendameno. Fokuñwi ha lu lati buiketelo bwa bona, kono luna ni kuteeleza ku bona ni hakuli cwalo. Eeni, sha. Ha lu lumelani ni zona, ha lu lati keto fokuñwi, kono kona mayendameno a naha ye. Naha itamilwe ku yona. Kona mafelelezo a likañi kaufela. Mi yona Kuta Yetuna yani haibulela kuli, “U na ni mulatu,” una ni mulatu. Luna ni kuba ni yona; haluna, haluna naha. Kucwani kambe nelusina sika se si cwalo? Kiniti. Kuna ni mayendameno kwa sika kaufela.

⁷⁹ Kuna ni mayendameno mwa papali ya mbola. Yo ki mulahisi. Kiniti. Mi haiba a bulela kuli, “Inwile,” kona mo kuinezi cwalo. Hanina taba ka so bulela, se Ni nahana, mo Ni ibonezi, mo i bonezi wena. Ki za bulezi yena. Ki yena mayendameno. Haiba a bulela kuli “Inwile,” mu na ni kulumelelana ni yena, kakuli kona mo ika ñolelwa fahalimu kuli, “inwile.” Kucwani kambe nekusina mulahisi, cwale kimañi ya na ka bulela niti? Yomuñwi ali, “i nwile,” yomuñwi uli, “ha i si ka nwa; neli mbola fela, ne li ya . . .” Kiñi, ne mu kaba ni likañi. Hamukoni ku ziba za kueza.

⁸⁰ Ku lukela kuba fokuñwi fo linzwi la mutu yomuñwi ki la mafelelezo. Amen. Ni ikutwa hande cwale. Kanya! Haleluya! Ku lukela kuba sesiñwi sa mafelelezo. Ni tabile hahulu ka seo. Oh, cwale, kuna ni mutu yakona kubulela kuli, “Ki sibi,” kamba, “Ha ki sibi.” Ni tabile hahulu ka seo. Ni tabile ka mayendameno. Hakuna ku kanana, hakuna tuso ya ku kanana. Mulahisi u bulezi kuli, “inwile,” kona mo kuinezi ona cwalo; mulumele ona cwalo mwa minahano ya mina, “kuli inwile,” ni kuzwelapili. Mi Mulimu ha bulela sika, kona mo si inezi! Hakuna mukwa wa ku kanana ka sona. Kona mo si inezi ona cwalo. Na bulezi cwalo. Ani kona Mayendameno a Mukreste, fo ki haiba ki Mukreste. Mulimu naize, “Eza ka nzila *ye*,” cwalo kona mo ku lukela ku ezezwa. Hakuna ku kanana, “Kihande,” muli, “neli fa . . .” Hakuna sika ka zona. Mulimu u bulezi cwalo, ao kona mafelelezo! Ani kona Mayendameno ku mulumeli wa niti. Eehe.

⁸¹ Kucwani kambe nekusina nto ye cwalo, ne lukaba kai? Kana ba Methodist bakona kuba hande, ba Baptist, Presbyterian, Lutheran, kamba ki sikamañi se si ka luka? Mwabona, ne lukaba ni, leo kona libaka ha mu—hamuna ni butata. Mi leo kona libaka. Li kwenuhile kwa mayendamemo ani, kona ha li keluha ni linaleli zeñwi zee.

⁸² Kono kuna ni mayendameno. Kuna ni kuba ni mayendameno. Ku lukela kuba ni mayendameno. Mi kuna ni

mayendameno. Leo ki Linzwi. Mi se ba bulela babañwi, hasina taba. Eeni, sha.

⁸³ Cwale, kambe nelusina mulahisi mwa papali ya mbola, mutu ni mutu na ka hohana ni yomuñwi mwa milili, ni kukanana ni kulwana. Mwabona? Kona ze lu tokwela mayendameno mwa Bukreste, lutuhele ku kumaula milili kwa, ni kukanana ni kulwana. Mwabona? Linzwi ha libulezi, ona ao kona mafelelezo. Musike mwa ekeza ku Lona kamba ku zwisa kwa Teni. Mu Li siye fela ona cwalo mo Li inezi.

⁸⁴ Mwa ziba, kuna ni mayendameno fa mukwakwa, sani ki liseli le li hanisa kuzamaya, sisupo sa kuzamaela fa mukwakwa. Ku cwani kambe kakusasana cwana ha si beleki? Oh, mawi! Kana mukile mwafita ku sesiñwi sa zona? Ni fitile ku silisiñwi na. Hakuna ku kakanya, mumatisi wa motikala kaufela. Kucwani haiba liseli lani ha li beleki? Kona kuli mutu kaufela uka omana. U ya kwapili kwani, mi yomuñwi uli, “Kina ya fitile fa pili,” yomuñwi uli, “Halu boneñi ni ku bulelele nto yeñwi, Ni lukela kuya kwa musebezi!” Oh, mawi! Basalibani inge ba zukuza tubukanyana, mi baana inge ba lwana ka liñindi, mi mubulele ka ziyezi! Ku lukela kuba ni mayendameno, sesiñwi si bulele kuli, “Yo u lukile,” mi kuba ona cwalo. Mi liseli lani hane li bulezi kuli, “yema,” li talusa ku yema. Ha li bulela kuli, “zamaya,” li talusa kuli zamaya. Haiba ha ku cwalo, u mwa butata.

⁸⁵ Mi cwalo kona mo kuinezi mwa bupilo bwa Sikreste. Kuna ni sibaka fa kuyema, mi kuna ni sibaka fa kuzamaela. Linzwi la Mulimu kona Mayendameno ani. Yani ki Kreste. Eeni, sha. Haiba muka . . .

⁸⁶ Haiba malaiti a mwa mikwakwa ha si ka tuka, kona kuli lu kaba ni siimpiti mwa mikwakwa. Mi Ni sepa kuli sani kona se lu nani kwani mwa likalulo ze ketalizoho za pentagoni kacenu; ki siimpiti, sa balumeli baba likanyisa, baba sa lumeli, ni lika zeñwi kaufela li kolatezi mwateni hamoho. Mu ba fela ni kusinana kihona. Kiñi? Habana mayendameno. Alimuñwi uli, “Kihande, luna ni. . . Luna ki luna mayendameno.” Yomuñwi uli, “Luna lu mayendameno.”

⁸⁷ Mulimu ki yena Mayendameno. Na ize, “Mubone kuli mayendameno kaufela, haisi a Ka, abe lishano. Aka abe a Niti!” Kacwalo, kuna ni Mayendameno kwa Bukreste. Ani kona mafelelezo kwa likañi kaufela. Biblele ibulezi ona cwalo, zeo kona ze Li kondisa hande. Eeni, sha. Ku lukela kuba mayendameno mwa lika kaufela.

⁸⁸ Babañwi inge fela likeleke kacenu, buñata bwa likeleke lina ni mayendameno a zona. Mutu ni mutu una ni za hae, nto yeswana sina mazazi a baatuli, mutu kaufela na eza mwa na hupulela kuli kona mo ku lukela. Kono yeo ha kinto yelukile. Mwabona, fani kona Linzwi la Mulimu ni bapolofita ha ne li siyo. Linzwi kona Mayendameno. Nebana ni mayendameno a

bona. Mañi ni mañi u bulela ki yena Niti ni nzila, “Luna lu Niti ni nzila.”

⁸⁹ Kono Jesu naize Nali yena Niti ni Nzila, “yona Niti, Nzila, ni Liseli.” Kana ku cwalo? Kihande, kanti, Yena ki Linzwi, kacwalo ki ao Mayendameno. Mi mayendameno a likopano, haana tuso mane; a fosahalile, amu atuhele fela.

⁹⁰ Cwale, mutu ueza hande mwa meto a hae, kono Mulimu una ni nzila yakuli mutu aeze lika ka yona. Mwabona, Mulimu ni Linzwi la Hae ni bapolofita ba Hae hane ba tondahala, mutu kaufela na ikezeza fela mwa na latela.

⁹¹ Mi kona se sibile mwa lizazi le, mañi ni mañi uli, “Ni—Ni wa siemba se.” Kana u Mukreste? “Ni wa Presbyterian.” Kana u Mukreste nji? Na ku buza. Musizana yomuñwi naize, “Ni kufa kuli u utwisise, Ni tukisanga kandela busihu ni busihu.” Muuna yomuñwi naize, mwa mukoloko wa tapelo, Ne ni mu buzize haiba nali Mukreste, ali, “Ni mu American. U nyamatata cwani zeo!” Inge kuli zeo lina ni za kueza ni Zona. Mwabona, ba tamilwe kwa naha. Omuñwi u tamilwe kwa kopano, lituto za litumelo.

⁹² Kono kuba *Mukreste* italusa “kuba inge Kreste.” Mi nzila fela yo kona kubela Mukreste ka yona ki kuli Linzwi libe ku wena. Ao kona mayendameno. Eehe. Ni boni taba yeo Ni si ka fetulwa kale, mi Ni tabile kuli Mulimu na ni ngile keleke isika ni shimba kale. Kacwalo Na ziba ha Ni . . .

⁹³ Mukutazi yomunde wa Baptist, Muzwale Naylor, umwa Kanya kacenu, na tile kwani, a ambola ni na. Mi, oh, kuna ni batu babañata bene ba ambozi ni na hane Ni—Ni lika kufumana Mulimu. Mukutazi wa ba Lizazi la Sabata na bata kuli ni ikopanye ku bona, ni zeñwi cwalo. Kono Na bona kuli ha Ne ni kaba Mukreste, Ne—Ne ni sike na bulela kuli, “Cwale Ni wa ba Lizazi la Sabata.” Cwale, zeo li lukile. “Ni wa Baptist.” Ku lukile, mwabona, kono Ne ni na ni kuba ni taba yeñwi yefita foo. Ne—Ne ni sa sepi, kakuli mañi ni mañi na lyangani.

⁹⁴ Na hupula kuli, “Kuna ni yomuñwi kokuñwi, ulukela kuba ni sesiñwi sa niti, kokuñwi.”

⁹⁵ Kacwalo Ne ni tokwa mayendameno, kacwalo Na nga iliñwi, Linzwi la Mulimu. Kacwalo Na bala mwa Linzwi kuli ki Yena Linzwi, Muñoli Joani 1. “Mi fa mayendameno aa, Ni ka yaha Keleke ya Ka.” Um-hum. Yeo ki niti. Kacwalo Na Mu nga ka Linzwi la Hae. Sinulo 22:19 ili, “Yo kaufela yaka zusa Linzwi li liliñwi ku Le, kamba ku ekeza linzwi ku Lona.” Ani kona mayendameno. Ani kona mafelelezo a likañi kaufela. Ye ki yona mayendameno. “Kaufela ya ka zwisa sika ku Yona, kamba kukeza sika ku Yona,” Mulimu naize, “Ni ka zwisa fela siemba sa hae mwa Buka ya Bupilo,” kacwalo Sani ne si na ni kuba mayendameno luli. Mi Jesu na bulezi kuli, “Mutu hana kupila ka buhobe fela, kono ni ka Linzwi kaufela.” Mi Na ziba kuli “Linzwi kaufela” nelina ni kuba cwalo. Ali, “Mulao fahalimwa mulao, mi

mubamba fahalimwa mubamba.” Kona mo Li na ni kutela, sina fela mo Li ñolezwi.

⁹⁶ Mi ki Hali, “Ha muina ku Na,” Ki yena Linzwi, “Manzwi a ka aina ku mina, mwakona ku kupa se mu lakaza.” Na ziba kuli haiba Bukreste neli Linzwi la Mulimu, mi Nali yena Linzwi, mi ka ku amuhela Linzwi, Linzwi la pila ku Yena, mi Na ziba, “Ha muina ku Na, ni Manzwi a Ka aina ku mina, mukupe se mu lakaza,” mi haiba muina mwa Linzwi ni siemba sa Linzwi, mu ka kupa fela seo Linzwi li mi bulelela kuli mu kupe. Muzibe kuli lizazi le mupila ku lona, konakuli, ni kukupa ka swanelo.

⁹⁷ Kacwalo he, lu kutele kwa tuto, kueza . . . Ku bulela cwale se ka butu, kono Ni tamilwe. Ni tamilwe ku Jesu Kreste, ku Yena, ka Linzwi la Hae. Ki yena Mayendameno aka.

⁹⁸ Ni fumani kuli likopano ze kaufela ni lika zeñwi nelina ni mayendameno a zona. Sika ni sika, sika ni sika, si na ni mayendameno a sona.

⁹⁹ Ba Katolika, pope nako ya bulela sika, kona ona cwalo. Ani kona mayendameno a keleke ya Katolika. Hanina taba ka sa bulela muprisita, sa bulela bishopu, sa bulela muokameli; pope ha bulela, kona ona cwalo. Ao kona kona mayendameno. Ki cona.

¹⁰⁰ Mwa keleke ya Methodist ni likopano zeñata za Baipanguli, sa bulela bishopu, kona mayendameno. Ku felile. Se i bulela tuto ya tumelo, ao kona mayendameno.

¹⁰¹ Mwa Mapentekota, ki sa bulela mutoneli yomutuna, kamba mwakona kuba ni mutu yo kutaha kwa ancafazo, kamba nee. Ani kona mayendameno. Ha u kananisa manzwi a hae, u ka lelelwa mwa kopano. Mwabona, Linzwi ha li talimwi kalikute ni hanyinyani. Mwabona? Mu ikungela mayendameno a, mañi ni mañi una ni mayendameno a hae.

¹⁰² Kono, mwa ziba, Ha ni buleli ze ka kashwau. Ni bulela ka niti. Ni ikutwa sina cwalo Paulusi mwa na i kutwezi, ha na bulezi cwana, mwa Likezo 20:24, “Hakuna taba ni yekana ye ni bilaeza.” “Hakuna ze ni tabela ku ziba mwahala mina; kwanda Jesu Kreste, Yena ya na kokotezwi.” Ha ni bilaezwi ki mayendameno aa, kamba ki pope, bishopu, kamba ki mutoneli yomutuna, kamba ki muelezi, kamba mulao, kamba kaufela seo sili sona, hakuna se si ni bilaeza kuzona zeo kaufela. Hanina taba kamba ba bulela kuli, “Kihande, haluna—haluna kukona ku- . . .” Sani ha si ezi shutano ni yekana. Hakuna ze ni tabela kuziba kwanda Jesu Kreste, Linzwi la Hae le li bonahalile mwahala luna. Ni tamilwe ku Sani. Ani kona mayendameno aka. Ni swalelezi hande ku Sani.

¹⁰³ “Kuzwa ha Ni . . .” Paulusi ali, “Kuzwa ha Ni Mu katana, fa mukwakwa, Ni sikuluhile. Ni . . . U ni otoloji hande.”

104 Mawi, mwa Na ni tamululezi! Ha ki ku otolola hande ni koo Na ni ezelize. Kono kuzwa ha Na ni otolola hande, Na tameha hande ku Lona. Na boni Linzwi kuli ki la Niti, lika kaufela ze shutana ku Lona ne li fosahalile.

105 Mwa ziba kana? Nana ni mulelo ha ni pilisa. Nana ni mulelo wa ku ku pilisa. Mi Ni tamehile, ka tato ya Hae, kueza tato ya Hae. Libaka la Na ezelize cwalo, Ha ni zibi libaka za Na ezelize cwalo.

106 “Ha ki kuekeza ku Yona kamba kuzwisa ku Yona!” Sina ha Ni bulezi, Sinulo 22:19 iize musike mwa eza cwalo. Haiba ki Yena Mayendameno a luna, haikoni kuba ka nzila isili. Hakuna mukwa wa kuli ibe ka nzila isili. Una ni kuba yena Mayendameno, yena Linzwi la mafelelezo.

107 Mwa ziba, nekuna ni ma milioni mwa sibi nako ye Ni piliswa. Nana ni mulelo wa ku ni pilisa. Ni ya ipitezi mwahala mizwale, linako zeñata; ya lumela mwa kulemuhiwa, peu ya noha, kolobezo ka Libizo la Jesu Kreste, mi lika zeñwi ze kaufela ze bonahala ku ba . . . ni lipono, ni mata a Kreste a kuta, ni kunyaza likopano ni lika zeñwi. Na ya ipitezi, kono Nana ni libaka la ku ni pilisa, mulelo wa kueza cwalo. Na ni pilisize hane kuna ni ma milioni a babañwi mwa sibi, kono Na ni pilisize ka libaka leliñwi. Neku na ni batu baba itutile, neku na ni batu baba butali, neku na ni baituti ba za bulapeli, neku na ni mabishopu ni madokota, ni ba bañwi cwalo, mwa simu, ha Na ni pilisize, kono Na ni pilisize ka mulelo.

108 Mi Ni bona kuli Linzwi kona Mayendameno, mi Ni tamilwe ku Lona, ni tamehile kuli Ni si ke na ziba sika sesiñwi kwanda Jesu Kreste, ili Yena ya na kokotezwi. Nana ni libaka la zona, mi Ni tamehile ku swalelela kwa libaka leo. Hakuna taba kamba mutu ubulela sikamañi, Ha ni na kuikambusa bona, kono Na ziba ko Ni tamehile. Na bata kuli ni be cwana. Na ni bupile ona cwana. Ni bupilwe ona cwalo ka mulelo. Ne ni bupilwe nina ni zona zeo, ni zeñwi kaufela, mi zeo kaufela hakuna mane, konakuli Na ni shitulezi zona, kubeya Sesiñwi mwateni; lani neli Linzwi la Hae. Mi Ni itamile kuli hakuna se Ni ka ziba kwanda Kreste.

109 Lifu la Kreste neli mayendameno. Neli ona fela mayendameno. Neli mafelelezo a sabo kaufela ku bene ba saba lifu. Lifu la hae kona mayendameno, kanti.

110 Sicaba sa saba lifu. Nihaiba Jobo na saba lifu. Kono ki ha na boni pono! Na zibile kuli lika kaufela ne li icongile; lubasi lwa hae, bona—bona bana ba hae. Nihaiba musala hae ha na mu fetuhezi, bakeñisa mu—mu munko wa—wa limbongola za hae; a zwela fande ayo ina fateni, fa libunda la mufuse, inza ñwaya ma—ma mambongola a hae ka siñetana. Mi musala hae mane ali, “Kiñi ha u sa lwahi Mulimu, ni ku i shwela?”

Ki hali, “U bulela sina musali wa sikuba.” Mwabona?

111 Mi cwale Elihu hana ambola ni yena . . . Leliñwi la mazazi aa, Ni bata ku ku mi tatululela libizo le, Elihu, ni ku mi bonisa kuli neli Kreste.

112 Hana bile ni buino bo, mi lika kaufela ne li mu lwanisa, mi ki ha bona pono ya Ya Lukile. Na bata kufumana Mutu Yana ka yema mwa pakani ni yena; kubeya mazoho a Hae ku mutu wa sibi ni Mulimu ya Kenile, ni kuyema mwa nzila. Mi Mulimu a mu lumeleza ku Li bona, myaha ye likiti zene kwahule. Neli ona mayendameno a hae. A nanuha a i inyunga. Haleluya!

113 Mutu ha saba kushwa, zuha mi u nyanganye, utalime mwa Linzwi mi ubone pono ya Mulimu seo ili sona.

114 A bona pono, mi ali, “Na ziba Muliululi waka wa pila, mi ka lizazi la mafelelezo Uka yema fa lifasi lee. Mi Ni sweli ku itiisa ku zona! Kamba likokwani za mubili li ka sinyu mubili woo, kono ona mwa mubili mo Ni ka bona Mulimu: Yo Ni ka iponela ili na. Ni tamehile ku yona,” a bulela. Na i boni. Neli sepiso ya Mulimu.

115 A talima mwa milao ya pupo. Sina hane Ni mi bulelela ka za zwelopili ya mulao wa pupo, zwelopili ya Linzwi, zwelopili ya kezo ya Mulimu, lika kaufela za zwelapili. Na buzize, mwa Jobo 14. Na ize, “Kuna ni sepo mwa kota, haiba ishwa; palisa, haiba ishwa; ni zeñwi cwalo. Kono,” ali, “mutu ha lobala, ni kupumeha moya, wa ikela. Bana ba hae ba bashimani ba taha ku to mu silisa, kono ha zibi. Oh,” mi ki hali, “ka bo U ka ni pata mwa libita, u ni pate ni ku ni beya mwa sibaka sa mukunda, kufitela buhali bwa Hao bu fita!” Na saba lifu.

116 Kono cwale ha to bona zani, kakuba mupolofita, abona zuho ya Jesu Kreste, a huwa ali, “Muliululi waka wa pila!” Mutalime, na Mu bizize kuli, “Muliululi.” Mutalime. “Na ziba Muliululi waka wa pila, mi ka lizazi la mafelelezo Uka yema mwa lifasi; ni ha likokwani za mubili wa ka lika sinyu mubili woo, kono ona mwa mubili waka wo Ni ka bona Mulimu.” Mulimu ni Muliululi neli nto yeswana, Mulimu ni mutu ne ba ezize iliñwi. “Ni ka bona Mulimu; Yo Ni ka iponela ka meeto aka, meeto aka a ka bona, mi isiñi usili.” Amen.

117 Isiñi mutu usili fela kono yena Muliululi yani, Mulimu, yani ki Yena yo meeto aka a bona. Yena ki Mayendameno. Ki yena Mayendameno. U zwisa sabo kaufela mwa lifu. U zwisa sabo kaufela.

118 Mwa Maheberu, kauhanyo ya 2, timana ya 14 ni 15, mutalime. Na ngile mufuta wa mutu, kuli ashwe sina mutu alimuñwi, ku shwela kamukana. Na ngile mufuta wa mutu. Muliululi yo ataha mi a ezwa mutu, kuli Akone kushwa, yena Muuna alimuñwi, kushwela batu kamukana. Oh, kana Na ezize cwani zeo? Ki sikamañi sa ti lo bela mutu Mulimu? Neli kuli alife mulatu wa mutu.

119 Kono, la Zuho kakusasana, A taha ni linotolo za lifu, lihele, ni libita. Amen. Mulimu, Ya na shwezi fa sifapano, kuli mane

mabita apalelwa ku Mu kiyela; hakuna, lihele ne li si ka Mu swala. Hakuna sene si Mu sweli. A zuha. Nana ni linotolo. A zuha, Mukomi, kakuli Na komile kaufela lifu, lihele, libita. Ha Na li mwa lifasi, A koma butuku. A koma lika kamukana. A koma mabibo. Na komile lika kaufela zene lukela ku komiwa. Mi a taha ni lifu, lihele, ni libita, linotolo inge li lila fa noka ya Hae; mi akambamela kwa Lihalimu, mi afa limpo ku kwa batu, mi ayo kuta ka Lizazi la Pentekota ni ku to lifa ku Pitrosi, kwa Keleke. Amen. Ki yena Mayendameno a luna. Sabo kaufela ya lifu . . . Kakuli Wa pila, ni luna lwa pila.

¹²⁰ Maroma 8:1, “Kabakaleo ka kubeiwa baba lukile ka tumelo, luna ni kozo ni Mulimu ka Mulena luna Jesu Kreste.” Lu fumana kuli, Ni lumela kuli yani ki Maroma 5, lu fumana cwalo. Mi—mi Yena ki kuluka kwa luna. Mulimu na Mu zusize ka lizazi la bulalu, kuli abeye tumelo ya luna ka kuluka, kuli lwa lumela cwalo. Mi A Mu zusa, kuli apake tumelo ya luna ka kuluka. Ki sikamañi sa Na ezize kanti? A Mu kutisa, yena muña Kuluka, kakuli tumelo yaluna ya lumela cwalo. Moya o Kenile, Kreste, wa taha ku zona, kwa kuluka kwa luna, kakuli lu zusizwe kwa lifu kuzuhela kwa Bupilo. Mi cwale lu bana ba bashimani ni basizana ba Mulimu, luinzi mwa libaka za Mahalimu ku Kreste Jesu, ulu beile baba lukile ka zuho ya Hae.

¹²¹ Zeo li lufa kuluka, ka kuziba, ka—kuli ki ka swalele ya puluso ya luna ye li mwahala luna cwale, ona Bupilo bwa Kreste luli bo bu pila kuluna. Mi cwale lukona cwani kulatula Linzwi? Kanti, Yena ki Linzwi le li lufa yona . . . sepiso ye. Moya o Kenile uteñi mwani. Ki sikamañi Seo? Isali yona Naleli ya kwa Mutulo yani, Kreste ki yena Naleli ya kwa Mutulo yani. Mi Moya o Kenile kona kuluka kwani ko ku supeza hande mulumeli ku yo punya kwa Naleli ya kwa Mutulo. Luli.

¹²² Moya o Kenile ukana u supezanga kwa Linzwi. Haiba U supeza kwa tuto ya tumelo kamba kopano, ha ki Moya o Kenile. Na si ke aeza cwalo, kusupela kwahule ni Linzwi la Hae, ha Na shwile kuli abonise Linzwi lani ni kueza Linzwi lani kuba la niti. Amen. Na shwile kuli Akone kutaha, yena Kasibili, mwa Linzwi lani. Ki yena Bupilo bobu fa piliso bwani bo bu eza Linzwi lani kuba le li pila hape. Wani neli mulelo wa Hae wa kushwa, kuli Akone ku iponisa Iliyena mwa Keleke ya Hae, ni ku konisa Linzwi kaufela, mwahala lusika kaufela, kueza fela ona cwalo mo Li lukela kuezeza.

¹²³ Ki yena mata a libelekiso. Libelekiso za Keleke, ki sikamañi seo? Baapositola, bapolofita, baluti, ni babañwi cwalo. Mi ki Yena mata a beleka zeo. Mi li beleka ka mata amañwi abizwa sina . . . Yena, Yena ki Mulilo o tumbula moya. Ki yena Mulilo oli mwa singongolo se si tuka, kuli haiba—haiba moya, haiba—haiba Linzwi, li suluhela mwa singongolo se si tuka sani, Ki yena Ya tukisa mulilo wateni. Ki yena Ya li paka. Ki yena mata a zuho. Ki yena Mulimu. Yena, Ki yena Mulilo, sani kona Sali sona.

124 “Kusina likañi,” kwa bulela Timotea Wapili 3:16, “kunutu ya bulapeli ki yetuna; kakuli Mulimu na bonahalile mwa nama, abonwa ki mangeloi, a amuhelwa kwa Kanya.” Nali Mulimu, ataha a to nga sibaka sa baezalibi. Eeni, sha. Mi cwale Yena, Mulimu, a Mu zusa ka—ka lizazi la bulalu, neli ka kuluka kwa luna. Kabakaleo, a pahamiswa kwa lizoho la bulyo la Yamata kwa Lihalimu, Ki Mulapeli wa luna, kuli a lu lapelele ka zaluna. . . ka bufokoli, halunze lu ipulela ku Yena, ni kushwa kwa neku la luna; abeya Linzwi la Hae kukutela ku luna, kona sepiso. Mi tumelo ya luna ieza Linzwi lani kuba le li pila, kakuli Kreste u ku luna, yena mupilisi wa Linzwi.

125 Mo Ni lakaleza kuli keleke ibone sani, likañi kaufela ni likopano zakona kufela! Yeo ikona kuba Kuta Yepahami. Yani kona Naleli ya kwa Mutulo. Haleluya! Ani kona mafelelezo a likañi kaufela. Ani kona mafelelezo a lipuzo kaufela. Ani kona mafelelezo a lika kaufela. “Mulimu na bulezi cwalo,” ani kona Mayendameno. Itame ili wena ku Ona. Paulusi naize, “Hakuna zeliteni, hakuna za kwapili, lifu, matuku, mapunu, manyando, hakuna ze kona ku lu kauhanya ku Zona.” Lu tamilwe kwa Mayendameno. Ali, “Kuli ni pile ki—ki Kreste, mi kushwa ki bufumu.” Hakuna ze tibela kwanda Sani foo. Ani ki Mayendameno.

126 Yena ki yena Mayendameno a luna kakuli luna ni sepo ya zuho, kakuli U zuhile ku luna. Lu ziba cwani? Wa pila. U eza ona cwalo fa sa Na ezize ha Nali fa lifasi fa. Ki yena Siita sa Mulilo se si swana, luna ni siswaniso sa teni fani. Ki yena ya swana mwa Keleke. Uteñi mo kacenu, mi mwa mubili wo U eza lika ka swanelo sina mwa Na ezelize ka linako zani.

127 Haiba bupilo bwa lihapu bu beiwa mwa mupusi, ha u na kubeya mupusi; ha ikoni, kakuli ki lihapu, kakuli bupilo ku lona ki bwa lihapu. “Mi haiba Mawi. . . Muina ku Na ni Manzwi a Ka aina ku mina, mukupe se mu lakaza!” Mukaba ni mahapu. Amen. Mayendameno, Ni ziba kuli ki Niti. Ni tamile moyo waka ku sani, mi Ni ziba kuli ki Niti. Linzwi la Mulimu, Kona Mayendameno a luna.

128 Matesalonika Babubeli, kauhanyo ya 2, lu bala cwalo. “Lu ka ngelwa hamoho ni balatiwa ba luna, ku yo Mu katanyeza mwa mbyumbyulu.” Oh, kamo pilu yaka i tulakela kwa Linzwi kaufela mwa Buka ya Hae, “Amen.” Mulimu naize, “Lu ka ngelwa mwa mbyumbyulu, ku yo katanyeza balatiwa ba luna.” “Amen,” kona Linzwi le li bulezwi mwa pilu yaka, kakuli Linzwi limwatani mwani.

129 “Ni patile Linzwi la Hao mwa pilu yaka, Mulena, kuli Ni si ke na Ku foseza. Ni a tamile kwa minwana ya mazoho aka, fa bulobalo bwaka. Wena uinzi nina kamita. Hanina ku sutiswa.”

130 “Ee, ni ha Ni ka zamaya mwa musindi wa muluti wa lifu, Hanina kusaba bumaswe, kakuli Wena ki wena Mayendameno

aka. Ni ka ya kulo kwani, mi Uka ni hoha kuzwa mwateni. Ni ya mwa mezi a buliba a sisepe sa ka, Uka . . . Ki wena ankora yaka. Amen. U kwa mulaho wa lisila lani. Ki Wena ya ka ni zamaisa mwahala liñungwa. Ki Wena ya kaba Kwani, mayendameno aka mwa Kanya, ha Ni taha kwa miluti ya musindi, miluti ya lifu.” Ha Ni taha kwa Jordani, ha Ni ka silela mwabuse, Ki yena Mayendameno aka. Ni tamilwe ku Ya zuhile kwa neku leliñwi, Uka ni hohela kufita mwa mezi a sabisa. “Hanina kusaba bumaswe, kakuli Wena una ni na.” Amen. Mutuhele mañungwa atahe, bupilo, lifu, kaufela se sili sona; hakuna se si ka kauhanya. Ni tamilwe kwa Musumo wani.

¹³¹ Musumo wani u sweli. U swalelezi ka kutiya mwa lisila. U sweli hande. Ne si kumalezi ku Mulimu mwa buse. Ne si sweli hande kwa pilu yaka. Moya o Kenile kona o ni hapeleza kwa sepiso yani: “KI NA!” Isiñi, “Ni ka ba teñi,” “Ne nili teñi,” “Ni kabateñi zazi leliñwi.” “Ki na Zuho ni Bupilo,” kubulela Mulimu. “Ya lumela ku Na, ni ha shwile, uka pila hape. Mi ya pila kaufela mi a lumela ku Na, haana ku shwa.”

¹³² Mutuhele lifu li eze kaufela ze li bata, halina ku ni bilaeza, kakuli Ni na ni sepo, Ni susuezwa kuli nahaiba mwa butuku bo bu kona ku ninga, kamba lilumo la tobolo, zazi leliñwi, lakona ku ninga, Ha ni zibi mo li ka bela, ki shutano mañi ye si eza kuna? “Kuna ku pila ki Kreste, mi kushwa ki bufumu.” Oh, mawi! Kakuli, Ni bata kuli Ni Mu zibe a inzi mwabuse bwa nuka ya lifu, ko Aka ni hohela fa Pila Hae zazi leliñwi. Ni beilwe ya lukile ka kuluka kwa Hae, kuli Ni amuhezi lifu la Hae la fa sifapano, Mulimu ya ezizwe mubili mwahala luna; u sali nama ku luna, u sali Moya mwa mibili ya luna. Amen.

¹³³ Ki yena Mayendameno aka. Ki yena lika zaka kamukana. Sika kaufela kwanda sani, hakuna sika mwa mazoho aka se Ni tisa. Hakuna se ni ziba kwanda Kreste, mi Yena ya kokotezwi; ha ni lati kuutwa sika sisili kaufela kwanda Kreste, mi Yena ya kokotezwi. Pilu yaka ili “amen” ku yeñwi ni yeñwi wa sepiso ya Hae. Kona ha Ni ziba kuli Moya o Kenile wa Hae kuba masupeza nzila, U ni zamaisa ku ya kwa Linzwi.

¹³⁴ Hakuna nahaiba iliñwi ya lipono zani yekile ya bulela sika kuna konji fela Linzwi le li lukile. Oh, fo kona fo Ni fumana sepo yaka, muzwale. Busihu bwani Ha ni bulelela ka zona, Ni boni lipono zani. Mi Ni ka mi buza, kana pono yani ikile yabulela sika se si shutana ni Linzwi? Hakuna nahaiba nako fo likile za fosahala. Kiñi? Ki Mulimu. Wani kona mutomo wa ka.

¹³⁵ Mi Na ziba, kakusasana omuñwi, mwa pono, Ne ni boni balatiwa baka mwabuse bwa nuka kwani. Liteni mwani. Ni tamehile kuya kwa Naha ya sepiso yani. Ni lukela ku yo kopana kwani zazi leliñwi. Eeni, luli.

¹³⁶ Ki yena Mayendameno aka. Ki yena Lizazi laka. Ki yena Bupilo bwaka. Ki yena musumo waka, Naleli yaka ya kwa

Mutulo. Ki yena ye Ni nahana kamita, Yena u cwalo ku na. Ki yena Bupilo bwaka.

¹³⁷ Likopano, ku na . . . Ha ni filikanyi maikuto a mina; Hani lati kueza cwalo. Kono Linzwi li swana sina mukwale o lozizwe kafa ni kafa, Halikoni ku kasha kusina ku pumaka, mwabona, sihulu ha Li pumaka mwa lififi. Mulemuhe, likopano liswana sina linaleli zeñwi, li shimbuluka ka kupotoloha kwa lifasi. Yeo ki niti. Kaufela ko liya lifasi, ba tuhelela bahame ba bona ku kuta milili yabona, kutina tuputula, ni lika zeñwi kaufela, ya shimbuluka fela ni Hollywood ni lika zeñwi kaufela. Kono, oh, muzwale, Yeo i sa siyala ili Niti, lona Linzwi le li sa zikinyehi la Mulimu ya pila lani i sali Niti! Kona Mayendameno aka. Se I bulela kona Niti. Mutuhele kopano i shimbuluke kaufela ko i bata kuya. Ba bata ku nyanyifaza Libizo la Jesu Kreste, ka mukanga, fo ku itingile ku bona. Kono, ku na, “Hakuna Libizo lisili mwatasa Lihalimu leli filwe kwa batu, le mu lukela kupiliswa ka lona.” Ku na, leo kona Linzwi la mutomo, fani kona fo kuna ni licwe la mwa lilulu. Hani lati ku yauluka ni kopano.

¹³⁸ Nina ni Masupeza nzila aka, ili Moya o Kenile, o ni supeza hande kwa Mayendameno. “Kakuli bubeli bwa lihalimu ni lifasi li ka fela, kono Manzwi a Ka haana kufela.” Mi Ni Li patile mwa pilu yaka, mi Moya o Kenile u ni supeza hande ku Lona. Hakuna ze ni tamehile lisili. Ao kona Mayendameno aka. Mutuhele fela kuli kube ona cwalo. Cwalo kona mo Ni batela. Oh, mawi! Cwale, muzwale, kezeli, ikezeze Mayendameno a hao ku Yena. Eeni, sha.

¹³⁹ Mwa nako ya butata yene Ni nani kwanu ha ki kale hahulu, ne ni tobezwi ki musala ka, bana, lika kaufela. Yomuñwi naize kuna, ali, “Kana u bulukile bulapeli bwa hao?”

¹⁴⁰ Se nili, “Batili, Bu ni bulukile.” Mwabona? Mwabona, Ne ni na ni Mayendameno, ka kuziba kuli zazi leliñwi Ni ka ba bona hape. Amen. Ne ni si ke na kona kambe Ne ni si ka ba ni Mayendameno ani. Si ezize shutano ku na, ko ne Ni tamilwe, kakuli Ne ni ziba kuli Ni ka ba bona hape.

¹⁴¹ Cwale, ka sishemo, Ni tamilwe ku Yena Yana bulezi kuli, “NITENI,” isiñi “Ne niliteñi.” “KI NA,” yaliteni, yaliteni kamita, yana ni-, ya ziba kamukana, yana ni-, ya mata kaufela, ya sa feli, yo kikuli Uteni isiñi “Nenili teñi.” “KI NA,” U sa li zuho. U sa li Naleli ya kwa Mutulo. U sa li lika kaufela, ku na.

¹⁴² Mushe nana ni mayendameno. Ha katana sicacani se si tuka mulilo sani, ani neli ona mayendameno ku yena. Fani Joshua—fani Joshua . . .

¹⁴³ Oh, mwa ziba, fokuñwi ha munga mayendameno, mayendameno aka mi isa kwa makazo. Yeo ki niti. Eeni. Makazo ki nto ya niti, kono haikoni ku tolokiwa. Ki makazo.

¹⁴⁴ Mi Joshua hana yemi fani, ni kubona kuli na na ni kutokwa! Mulimu na mu lumile kuli aye kwani mi a hape naha yani, ku yo shapaka batu bani kaufela, ni—ni kubeya Isilaele mwa naha.

Mi zazi leliñwi, limpi za komiwa, mi kwande mwa naha. Mi ni—mi taba yapili mwa ziba, na ziba kuli na ba shapile, ibile fela na ba shapakile. Kacwalo, ha na ezize cwalo, lizazi ne li likela. Mi Joshua na tamilwe kwa Mayendameno, Linzwi la Mulimu, yena Mubupi. Na tamilwe kwa musebezi wa na tokwa kueza. Amen.

¹⁴⁵ Fokuñwi ha ki nto ye tabisa kuba ni yona; una ni ku holofaza maikuto, ku pumaka ni ku lemakiwa. Kono ki mayendameno.

¹⁴⁶ Na na ni butokwi. Na ize, “Lizazi, aku yeme nonga, mwabuse! Kweli tuwe, inelela ona foo!” Mi, ka lihola ze twenti-foo, la yema inze likuzize. Oh, mubulela ka za makazo! Kono yena na tamilwe kwa mayendameno, ka tumo. Eeni, kiniti, Mulimu na mu lumile.

Joani na ziba hande kuli na ka bona Nkwilimba ha I taha ku Yena.

¹⁴⁷ Ha ne Ni boni Siita sa Mulilo sani, inge Paulusi fa musipili wa kuya kwa Damaseka, Na ziba kuli yani neli Mayendameno a Mulimu, nekuna ni ancafazo ye ne taha ye ne ka hasana mwa linaha. Na ziba kuli Ne li ka twaaleta Kutaha kwa bubeli kwa Jesu Krete, mi Na lumela cwalo mane ni kacenu. Ki Mayendameno aka, ni ha ne ikaba makazo. Luli, neli makazo, kuli Siita sa Mulilo si nyendaele mwa mbyumbyulu mwani. Ni mapampili ni lika kaufela ze ne kopile siswaniso sa Sona.

¹⁴⁸ Neli makazo, zazi leliñwi, ka Liatamanyi la 15, kamba Kanda ya 15, Na lumela . . . batili, Liatamanyi la 15, mwaha o felile wo. Mi, likweli zetalu kamba zene kwa mulaho, *Muñaka, Ki Nako Mañi?*, naize kuli lu ka zwela kwande kwani, “Mi Mangeloi a supa aka kopana, ni ku kuta, mi ni—ni Buka ya Maswayo Asupa ika kwaluha.” Mi inge luyemi fani ni Muzwale Fred Sothmann, ya sa zo bulela kuli “amen” koo, ne ni yemi kwani bukaufi ni yena, kiñi, Ne ni ba bulelezi kuli, “Ku kaba lilata le li ka nyunga naha kaufela.” Mi se Nili, “Likaba teni. Kakuli SA BULELA MULENA KISONA.” Siteni fa matepu, matepu, matepu, kuzwa kwa Phoenix maneku kaufela. “Kakuli SA BULELA MULENA KISONA.”

¹⁴⁹ Zazi leliñwi, inge ni yemi kwani, inge ni itomola miutwa, kamba liseto zeñwi cwalo kwa mahutu, sina cwalo; kwani Mangeloi a supa a tuluka mwa mbyumbyulu ni ku nyunga sibaka sani, kufitela, macwe, ana ni bukiti bo bulikana lipaundi ze mashumi aketalizoho kamba mashumi a silezi, a pikuluswa fafasi lilundu. Ne ku yemi Mangeloi a sebene inza yemi fani, a ni luma kutisa Mañusa aa, mi ali, “Alimuñwi ka alimuñwi” na ka “kopana ni kubulela sene si ezahalile.” Mi sa ezahala ona cwalo luli. Mi ha yo kambamela kwa Lihalimu, sina *cwalo*, a ya limaili ze mashumi amalalu mwa mbyumbyulu; mi, ka lizazi le liswana, ba kopa siswaniso sa Sona, sayansi ya eza cwalo, ni kupotoloha lifasi. Ki makazo, kono neli Mayendameno. Ne si ni tamile hande

ku Jesu Kreste, sa kenya bupilo bwaka ku Yena. Ni ziba kuli ne si bonahalile buipiteli. Si cwalo kamita.

¹⁵⁰ Neli makazo ku Paulusi, ya ku katanyeza Jesu mwa musipili wa kuya kwa Damaseka. Ki makazo Mulimu ha cinca bunsu, pilu yensu ya muezalibi ni ku i tapisa mwa Mali a Hae Tota. Ki makazo. Kiniti. Kana mwa lumela mwa makazo? Mi ona makazo yeo, haiba i zamaelela ni Linzwi la Mulimu, yakona kuba mayendameno a hao. Cinceho ya Paulusi neli makazo, mi yaba mayendameno a hae.

¹⁵¹ Muhupule kwanu, nako yeñwi yefitile, Ne ni inzi ni mulekisi wa milyani, mi ne lu sweli kuambola mwa sibaka nyana. Ki hali, “Muzwale Branham, Ni bata ku kubuza nto yeñwi.” Mi nali wa Baptist, yena kasibili. Ki hali, “Kana wa lumela mwa makazo?”

Se nili, “Luli. Kaniti na lumela.”

¹⁵² Ali, “Ha ni koni kubulelela nto ye ku usili konji wena,” ali, “kono Ni—Ni ziba kuli wa lumela cwalo.”

¹⁵³ Ki hali, “Ka nako ya ñalelwa,” ali, “neba na ni kuba ni mulao, kuzwa kwa naha, kuli bangele bakuli mulyani.” Mi ali, “Zazi leliñwi, Ne ni inzi kwa mulaho kwanu mwa sintolo sa milyani.” Ali, “Mwana ka na libelela baleki.” Mi ali, “Na bona mu—mu musali ya kena mwahali.” Ali, “Na li . . . No ka bona kuli na ka ba me ona fani.” Mi ali, “Mutu yani na palelwa kuyema. Mi muuna hae na apezi za manyando nyando, bubeli bwa bona mane. Mi a yendamena kwa neku la tafule fa kulekiseza. Mi ki ha yo buza mwana ka, mi ali, ‘Ni na ni kapepa fa kakañozwe ki dokota ka mulyani.’ Ki hali, ‘Kikuli wakona ku ni ñolela kona kuli ni ise bo musala ka kwa ndu?’ Ki hali, ‘Ni likile ku mu lumeleza kuyema mwa mukoloko wani. Ha ni talima mwa mukwakwa mwani,’ ki hali, ‘ikaba liholo zene kamba ze ketalizoho.’ Mi ali, ‘Hakoni kuyema cwale, wa iponela ni wena.’”

¹⁵⁴ Mi mutangana ali, “Muñaka, Ha—Ha ni koni kueza cwalo.” Ki hali, “Ni lukela kuba ni kuleka seo pili,” ali, “kakuli Ha—Ha ni koni kueza cwalo. Ki kulwanisa fela milao.” Mi ali . . .

¹⁵⁵ Bo ndatahe ba li nebainzi kwa mulaho kwani inge ba teezeza, kubona sa na ka bulela mushimani. Mi ki hali, “Fa muzuzu fela, mwana ka. Ki sikamañi seo?”

¹⁵⁶ Mi ali aya kwateni. Mi muuna muhulu, Mukreste wa niti, muuna ya tozizwe luli wa mucembele, ki hali, “Ki sikamañi, muzwale waka yomunde?”

¹⁵⁷ Mi ki hali, “Muñaka,” ki hali, “Na . . . musala ka, u fakaufi fela ni—ni—ni ku puluha.” Ki hali, “Ni—Ni . . . Ni nani piho ye zwa ku dokota fa; mulyani omuñwi, ulukela kuba ni ona fa cwale.” Mi ali, “Ne—Ne ni mu isize kwani ku yo yema mwa muzuzu kwani.” Mi ali, “Ni—Ni . . . Talima fa mukoloko wo,” ali, “Na kakanya haiba Ni ka kena, musihali wo.” Ali, “Ha ni zibi fela haiba—haiba wa kona ku ni ñolela se?” Ali, “Nika—Nika

yema fani; Nika—Nika ku ngela masheleñi, zo bata kuleka ni kulifele.”

¹⁵⁸ “Kiñi,” ki hali, “kaniti, sha, Ni ka ku lekela ona.” Mi a beya pampili yani fafasi, a kuta kwa mulaho. A bulela kuli mushimani wa hae akuta kwa mulaho akala ku libelela mutu yomuñwi.

¹⁵⁹ Ali, “Kalibe yomunyinyani yani atalima fande, habeli kamba halalu. Na yemi fela fani, mufufuzo kwa sifateho, na ziba kuli na kuli maswe. Mi muzwale na yemi fani ni mazoho a hae ali ku mu kambeka, mwa ziba, ali, ‘Yema fela itiise, mulatiwa, cwale fa nako nyana fela.’ Ali, ‘Mulekisi wa milyani yomunde u ka lungela mulyani.’”

¹⁶⁰ Ki hali, “Ni lukisize mulyani kapili mo Ni konela, ni kuñola munwelo wa mulyani.” Mi ali, “Hane Ni kala ku mu swalisa ona mwa lizoho,” ki hali, “Muzwale Branham, Na talima mi Ne ni sweli ku u swalisa mwa lizoho la liñiba la mapo.” Ki hali, “Na bona miutwa fa liito la Hae.” Ki hali, “Na itima kwa meto, mi Na talima kwa mulaho.” Ki hali, “Na lemuha ona fani kapili, mo ne Ni ezelize ku ‘babanyinyani ba Ka,’ ne li ezelizwe Yena.”

¹⁶¹ Ali, “Kana wa lumela cwalo?”

Se nili, “Ka pilu yaka kaufela, dokota, Na lumela linzwi kaufela la yona.”

¹⁶² Ki sikamañi seo? Ki hali, “Kuzwa nako yani, Kreste ubile yomutuna kuna. Kakuli, ka kueza cwalo ku musali yani,” ali, “neli makazo. Hakuna ku kakanya kono zeo batu ba fela fela haba koni ku li lumela, kono,” ali, “Ni hupula kuli, ni bulele fela wena, kakuli Ni ziba kuli u bile ni kutwisiso yecwalo.”

Se nili, “Eeni, sha. Yeo ki niti,” Na bulela.

¹⁶³ Na hupula, fani, Muhalalehi Martin, hana sweli kubala za hae. Hanali fela—fela mushimani, ya bizizwe ki Mulimu. Sicaba sa habo neli sa buhedeni. Mi ndatahe nali—nali ya ipitezi, oh, Ha ni zibi, Ni sepa neli muuna wa busole, mi—mi kulukile kuli bashimani ba bona ba ba latelele. Ki hali. . . zazi leliñwi ha ni kena mwa muleneñi mwani. Ni libezi kuli neli kai cwale. Mi Ni sepa kuli nali muuna wa mu French. Mi ki ha bulela kuli na ya mwa pakani; nekuna ni muuna muhulu ya na lobezi fani, na kangela kuisa kubata kushwa, neli nako ya silami maswe. Mi sicaba ne ni sweli kufita, ne ba sa mufi sika. Mi abulela kuli na yemi. Mi sicaba ne si ipulela fela kuba balumeli, mi ne si itamaela fela, si mu tobohile muuna yani fani. Mi na sweli ku kupelela sa kuapala, abulela kuli na kangela kubata kushwa.

¹⁶⁴ Mi Muhalalehi Martin aya kwani, a si ka cinciwa kale, cwale, anga koti ya hae, kakuba musole, ni ku i pazula fahali ni kuapesa mukunyandela yani wa mucembele cwalo, siemba sesiñwi a i kapesa yena. Batu ba mu seha, bali, “Ki musole ya bonahala kusehisa, ni koti ye si ka kwana.” Mwabona, si kuezisa lika ze

ipitezi. Nekuna ni sesiñwi ku yena, sa na lumela kuli nekuna ni Mulimu.

165 Busihu bwani, kasamulaho amano shwa ni kulobala fa nako nyana, a zuha. Yomuñwi a mu zusa, mi a talima. Inza yemi fani kwa mumbeta wa hae, mi fani neku yemi Jesu inza itatelize mwa siemba sa koti yani. Ani neli makalelo a Muhalalehi Martin.

166 Neli sikamañi sani? Nana ni mayendameno, kuli Linzwi la Mulimu ki la niti. “Se mueza ku babanyinyani ba Ka, mu si eza ku Na.” Muzwale, Ni tamilwe kwa Mayendameno ani. Mi Ni ziba kuli mañi ni mañi wa mina . . .

167 Kufita kuba ni pizo ya kwa katala, kakusasana cwana, Ni sepa Ni tabela kuba ni pizo ya kuipa. Ha lu ipeni ili luna kwa Mayendameno aa. Kana mwa lumela kuli Linzwi kona Mayendameno a Mulimu? Kana mwa lumela kuli Wa swana kacenu Mwa kile abela kamita?

168 Kuna ni bakutazi mwahali mo, kana ha mu tabeli ku neela bupilo bwa mina, fela, munge fela Mayendameno? Ki sikamañi se lubata kacenu? Ki sikamañi se lubatela kadi ya kopano kamba pampili ya bupaki? Lu bata Jesu Kreste. Ha lu si ka tamiwa kwa kadi ya kopano. Lu tamilwe kwa Linzwi la Mulimu, “Jesu Kreste ya swana maabani, kacenu, ni kuyakuile.” Kana mwa lumela cwalo?

169 Ha lu nanuheñi fela cwale mi lufe bupilo bwa luna sinca. Ni bata bwaka kuba cwalo, nina. Na itama ilina, sinca. Ni tatuba mutamelo waka, kutama linungo. Na tatuba mayendameno aka. “Mulena, haiba kuna ni sika kaufela kuna, kwanda Linzwi la Hao, sizuse. Hakuna se ni ziba kwanda Hao. Hakuna se ni bata kuziba kwanda Hao.” Cwale, mañi ni mañi, ka nzila ya hao.

170 Ni bile ni ambola ku mina mwahala biki. Ni mi bulelezi Niti. Mulimu upakile Niti. U li ezie kukuta kutela, ni kukuta hape. Mwa ziba seo Mayendameno ali sona. Cwale ku mina ni Na, hamoho, mina basali kaufela, mina baana kaufela, bashimani, basizana, kaufela semuli sona, halu ezeni; kaufela mina ba kwaya, kaufela—kaufela mina sicaba mo, kai ni kai, hamoho; fafasi mwa muzuzu wa fafasi, fahalimu mwa situwa, kwa mamota, kwa mulaho maandamino; kaufela ko luinzi, ha lungeni Jesu, yena Mayendameno a luna, kakuli luna ni kutaha mwa misindi ya muluti wa lifu. Hakuna ze ni ziba kwanda Hae. Ki yena Mayendameno aka, kakuli U zuhile mwa bupilo bwaka mi Ni ziba kuli Ki wa niti.

171 Halu nanuleñi fela mazoho aluna cwale ni kulapela. Halu ezeñi sebelezo ya kuipa.

172 Mulena Jesu, Linzwi la Hao lizwa kwa hule kwa kale, Ki makalelo ni mafelelezo. Na cwale, hamoho ni kopano ye, ni ipa ili na, sinca, fa katala fa kacenu. Ni kupelaa keleke ye, yona Life Tabernacle, kuba ni kuipa. I feze kushutana kwa yona, kaufela zona li yonge, za kale libe za kale. Bakutazi ba Evangeli,

baba bilaela . . . mi bene ba hupula kuli sesiñwi si ka ezahala. O Mulimu, lwa i tama ili luna, kakusasana cwana, ku Jesu Kreste yena Linzwi; ni kuikataza kutokwa kuziba nto isili fela kwanda Kreste, mi Yena ya na kokotezwi. O Naleli ya Kwa Mutulo, O Moya o Kenile, Wena Masupeza nzila a Mulimu, taha cwale mwa pilu kaufela. Mi luipa ku Wena, ka Libizo la Jesu Kreste. Kanya ku Mulimu! Amen.

Ku lukile, muzwale.



MAYENDAMENO LOZ63-1201M
(An Absolute)

Liñusa le ka Muzwale William Marrion Branham, neli kotalizwe lwa pili mwa Sikuwa Lasunda kakusasana, Ñulule 1, 1963, ili fa Life Tabernacle mwa Shreveport, Louisiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org